

# የሃንሳው ዬዳ ሳፃ ገሉዋ

የሃንሳው ዬዳ ሳጺ ደፈቱዳዌ፡ አማንያ አሳቱ የሱስ ክርስቶስ ባረንቱ ጎዳ ኦሊደ፡ ጌሻተላን ደኤዳ ድራው፡ ኤንቱንታ መቱን ዋዪ ጋኬዳ ዎድያና። ጸናያ ሁጳ ቆፋይ፡ ናባብያዋንቱ ህድታይ ኩመንላ ግዳናዳን፡ ኤንቱንታ መንፍሳናሳን ባረንታ ጋኬዳ የደሳን መቱዋ ግደን ባረንቱ አማኑዋን ሞናናዳን፡ ኤንቱንታ ሞንሳናሳ።

ማጻፋ ግደን ዳርያ ባጋይ ዳራነ ካል ካሊደ ቆንጨዳ ሳጺቱዋ ኦይቄዳዋ። ሳጺቱ ሄ ላይላን ደእያ አማንያ አሳው ገልያዋንታ። ሸን ሀራቶ ጹራ ግዲደ ቆንጨና ሃሳያን ሸቄድኖ። ማዘመርያ አዘማች ዛረትያዋዳን፡ ሀ ማጻፋ ግደን ደእያ ሁጳ የዋቱዋ ዲማ ዲማ ሳጺቱ ባጋና ዲማ ዲማ ማላንን ዲማ ዲማ ሞስልያ ፓይዳቱዋን ዛር ዛሪደ ሸቄድኖ። ሀ ማጻፋ ጸልያዋን ዲማ ዲማ ቆፋይ ደኑፕን አው ግደ ቆፋይ ቆንጨ። ሄዌነ፡ “ጸሳይ ጎዳ ግዴዳ ክርስቶስ ባጋና ላኤፍ ሀናታን፡ ባረ ሞርከቱዋ፡ ሴጻናናካ እትፕ፡ እት ገደ ዉርስላ ጸኑዋ ጸናና። ፖሌዳዋፕ ጉይያን ባረው አማነቲደ ደኤዳ፡ ባረ ባጋቱዋ ኦራላ ሳሉዋነ ኦራላ ሳኦ አንጂዋ ላትሳና” ያግያዋ።

## ሸምጋቱዋ ኡባቶ እመቴዳ ቃንሳ ቆፋቱዋ

- ገሉዋ 1:1-8
- ሳፃ ደያነ ላፑ ዎሳ ጎለቶ ኪተቴዳ ኪታ 1:9—3:22
- ማጻፋነ ላፑ ማታፋቱዋ 4:1—8:1
- ላፑ ማላካታቱዋ 8:2—11:19
- ዳዊያነ ላኤ መሄቱዋ 12:1—13:18
- ዲማ ዲማ ሳጺቱዋ 14:1—15:8
- ጸሳ ሀንቁዋ ላፑ ጸኑቱዋ 16:1-21
- ባብሎን ባሻ፡ ዲኦ፡ ዎርዶ ናብያነ ሴጻናይ ጸነትያዋ 17:1—20:10
- ዉርስላ ፕርዳ 20:11-15
- ኦራላ ሳሉዋ፡ ኦራላ ሳኦ ኦራላ የሩሳላዎ 21:1—22:5
- ዉርስላ ቁትያ 22:6-21

1 ኤሌል ሀናናው በሰያዋ ባረ ኦሳንቻቱዋ በሳና ማላ፡ ጸሳይ የሱስ ክርስቶስ ሳጺ ለማ፤ የሱስ ባረ ኪታንቻ ኪቲደ፡

ሀ ሳዩ ባረ ኦሳንቻ የሃንሳ ኤርሴዳ።

2 የሃንሰ በኢደ ቱማተላን ኦዴዳ ኡባባይ፣ ጸሳ ቃላነ የሱሰ ክርሰቶሳ ማርካተላ።

3 ሀ ማጻፋ ናባብያ ኡራይ \* እንጀቴዳዋ፤ ቃይ ሀ ትምቢትያ ማጻፋ ሰስያዋንቱነ ሀ ማጻፋን ጸፈቴዳዋ ናግያዋንቱ እንጀቴዳዋንታ፤ አያው ጎጥ፣ ሀ የዉ ፖለታናዉ ዎዲ ማታቴዳ።

**ኢሰያን ደእያ ላፑ ዎሳ ጎለቶ ኪተቴዳ ሳርታ**

4 ታን የሃንሰ፣ ኢሰያ ጋድያን † ደእያ ላፑ ዎሳ ጎለቶ ያጋይ፤

ካሰ ደእያ ጸሳጥ፣

ሀእካ ደእያ ጸሳጥ፣

ሰንሳጥካ ያና ጸሳጥ፣

ቃይ እ ካዉተላ ኦይድያ ሰንሳን ደእያ ላፑ አያናቴዋጥ፣

አጼ ከካተላይነ ሳርተላይ፣

ሀንተንቶ ግድ።

5 ቃይ አማነቴዳ ማርካ፣

ሀይቁዋጥ ኮይሮ ደንዴዳ ናአጥ፣

ሳኣ ካታቴዋ ሞድያ የሱሰ ክርሰቶሳጥ፣

አጼ ከካተላይነ ሳርተላይ፣

ሀንተንቶ ግድ።

እ ኦና ሰቄነ፣

ቃይ ኦ ናጋራ አይለተላጥካ፣

ባረ ሱላን ኦና ከሴዳ።

6 ኦና ባረ ጸሳዉነ አዎ ኦላና ማላ፣

እ ኦና ካታቴዋነ፣

ቄሳቴዋ ኦሴዳ፤

አዉ መድኛጥ መድኛ ጋካናዉ፣ ቦንቹነ

ሞድያ ዎልቃይ ግድ። አመንእ።

7 በአተ፣

የሱሰ ሻርያን ዬ።

አሳይ ኡባይ፣ ሀራይ አቶ፣

እ ጫዴዳዋንቱካ፣ አ በእና፤

ሳኣን ደእያ አሳይ ኡባይ፣

\* **1:3 ናባብያ ኡራይ፦** ሀዋ ጉሳይ ኡባ አሳይ እትጥ ጸሳ ጎሸትያ ዎደን ሄዋንቶ ቃላ ናባብያ ኡራይ እንጀቴዳዋ ጉሳ። † **1:4 ኢሰያ ጋድያ፦** 1:4—3:22 ደእያዌ ዳብዳቢያ ግዲደ ጸፈቴዳ። ኢሰያ ጋዲ አዋይፊ ዶልያ ባጋና ደእያ ርመ ካዉተላ ግዲደ ሀእ ሀ ዎድያን ቱርከ ጋድያ ጊደ ጼሰትያዋ። **1:4** ከሳ 3:14፤ ሳዩ 4:5 **1:5** አሳ. 55:4፤ ማዘ. 89:27 **1:6** ከሳ 19:6፤ ሳዩ 5:10

እ ጋሱዋን ዩካናዋንታ።  
ሀዌ ቱሙፕ ሀናናዋ። እሙንእ።

8 ካሰ ደእያዌ፣ ሀእካ ደእያዌ፣ ሰንፋፕካ ያና ጎዳይ፣ ኡባፕ ዋልቃማ ጸሳይ፣ “ኡባባዉ አልፋይነ ኦሜጋይ፣ ኮይሩነ ዉርሰላይ ታና”። ያጌ።

**ክርሰቶስ ሳጸን ቆንጨዳዋ**

9 ታን ዮሃንስ፣ ህንተንቱ እሻይ፣ ህንተናና የሱስ ክርሰቶሳ ዋይያነ አ ካወተላ ቃይ አ ዳንዲያ እትፕ ሻከትያዌ፣ ጸሳ ቃላ ኦዳዳ ድራዉነ የሱሳዋ ማርካቴዳ ድራዉ፣ ፒጽዋ ግያ ሃላይ ደደ ቢታን ደኣድ።

10 ጎዳ ጋላሳን ታን እያናን ደእይ፤ ታን ታፕ ጉየና ማላካታ ዋሱዋ ማላ ዋልቃማ ኮሻ ሰሳድ።

11 ሄ ኮሻይ ታና፣ “ኔን በእያዋ ማጻፋን ጻፋ፤ ኢሰያን ደእያ ላፑ ዋሳ ጎለቶ፣ ኤፈሶና፣ ሳምርኔሳ፣ ጳርጋሞና፣ ትያጽርና፣ ሳርዴሳ፣ ፕላደልፍና፣ ሎዶቅያ ዋሳ ጎለቶ ዬዳ” ያጌዳ።

12 ታን ታዉ ኦድያ ኮሻ በእናዉ ጉየ ሰማድ፤ ጸምፕያ ዋልያ ላፑ ዋርቃ ባላቱዋ በኣድ።

13 ሄ ባላቱዋ ግድን አሳ ናኣ ማላትያዋ በኣድ፤ አዲሳ አፍላ ባረ ገድያ ጋል ማዪድ፣ ዋርቃ ዳንጨዋ ባረ ትራን ዩሽ አሌዳ።

14 አ ሁጲነ አ ሁጲያ ብናናይ ቦላ ዶርሳ እስክያነ ሄዋፕካ አጲደ ሻቻ ማላቲ፤ አ አይፊካ ታማ ላጨዋ ማላቲ።

15 አ ገዳካ ጮጭያ ታማን ቲሪደ ጳልያ ናሃሰያ ግያ ብራታ ማላቲ፤ አ ኮሻይካ ዋልቃማ ሻፋ ጉንላ ማላ።

16 እ ባረ ኡሸቻ ኩሸያን ላፑ ጸልንታቱዋ ኦይቄዳ። አ ዶናፕ ላኡ ባጋና ቃረቲዳ ማሻይ ከሴዳ። አ ዳሙካ ሎይሳ ፖእያ አዋይፍያ ማላቲ።

---

1:7 ዳኔላ 7:13፤ ማቶሳ 24:30፤ ማር. 13:26፤ ሉቃሳ 21:27፤ 1 ተሰ. 4:17፤ ዛካ. 12:10፤ ዮሃ. 19:34፤ 37 ። 1:8 አልፋይነ ኦሜጋይ፡- ሀዋ ጉሳይ ኦራላ ጫቁ ኮይር ግሪክ ቃላን ጻፈቲዳ ድራዉ፡ ኮይሩነ ዉርሰላይ ጋናዉ ኮዪድ፡ አልፋ ግያ ግሪክ ኮይር ፕዶልያ እኪደ ዉርሰላዉ ቃይ ኦሜጋ ግያ ዉርሰላን ደእያ ፕዶልያ እኪድና። ሀዋንታ ጉሳይ ለምሱዋን ዳዉርሱዋ ፕዶላቱዋ እክንቶ [አ - ዝ] ያግያዋ ማላ ጉሳ።

1:8 ሳ፡ 22:13፤ ከሳ 3:14    1:13 ዳኔላ 7:13፤ 10:5    1:14 ዳኔላ 7:9፤ 10:6    1:15 ሀዝ. 1:24፤ 43:2

17 ታን አ በኤዳ ዎደ ሀይቄዳዎዳን ሀናደ፣ አ ገድያ ማታን ኩንዳድ። ባረ ኡሸቻ ኩሸያን ታ ቦላ ዎሊደ፣ ታና ሀዎዳን ያጌዳ፤ “ያዮፓ፤ ኮይሩካ ዉርሰላይካ ታና።

18 ታን ደኡዋን ደእያዎ። ታን ሀይቃድ፤ ሸን በአ፣ መቋ መቋናዉካ ደኡዋን ደእይ። ሀይቄዎ ቁልፒነ ሰኦልያ ቁልፒ ታ ኩሸያን ደኤ።

19 ሰዎ ኔን በኤዳባነ ሀእ ደእያዎ፣ ቃይ ሰንላፕ ሀናናባ ጸፋ።

20 ኔን ታ ኡሸቻ ኩሸያን በኤዳ ላፑ ጸልንታቱዎ ብለላይነ ቃይ ጸምፓቱዎ ዎልያ ላፑ ዎርቃ ባላቱዎ ብለላይ ሀዎ፤ ላፑ ጸልንታቱ ላፑ ዎሳ ጎለቱዎ ኪታንቻቱዎ፤ § ዎሳ ጎልያ ላፑ ዎርቃ ባላቱ ላፑ ዎሳ ጎልያ።”

## 2

### (1) የሱስ ኤፈሶንን ደእያ ዎሳ ጎለዉ ጎዎ

1 ኤፈሶንን ደእያ ዎሳ ጎለ ኪታንቻዉ ሀዎዳን ያጋደ ጸፋ፡

“ባረ ኡሸቻ ኩሸያን ላፑ ጸልንትያ ኦይቄዳዎ፣ ጸምፓቱዎ ዎልያ ላፑ ዎርቃ ባላቱዎ ግዴዎና ሀመትያዎ ሀዎዳን ያጌ።

2 ታን ነ ኪታ፣ ነ ዳቡራነ ነ ገንጨዎ ኤራይ። ቃይ ኔን ኢታ አሳቱዎ ገንጨናዉ ዳንዳያቤናዎካ ታን ኤራይ፤ የሱስ ኪቱዳዎንታ ግደናን ደኢደ ባረንታ፣ ኑን የሱስ ኪቱዳዎንታ ግያዎንታ ኔን ጸምሳደ፣ ኡንቱንቱ ዎርደ ግድያዎ ደሜዳዎካ ኤራይ።

3 ኔን ገንጨዳ፤ ቃይ ታ ሱንላ ድራዉካ መቱዎ ዳንዳያዳ፤ ደቡራብይካ።

4 ሸን ታን ኔና ካድያባይ ደኤ፤ አያዉ ጎፕ፣ ኔን ካሰ ነ ሲቁዎ አጋዳ።

5 ሰዎ ኔን ሀቃፕ ኩንዳድንቶ አኬካ። ነ ናጋራፕ ሰማ፤ ኔን ካሰ ኦልያ ኦሱዎ ኦላ። ሄዌ ጳዮፕ፣ ታን ኔኮ ያና፤ ያደ ኔን ነ ናጋራፕ ሰማና ጳዮፕ፣ ኔን ጸምፕያ ዎልያ ነ ባላ አ ሳአፕ አካ ድጋና።

6 ሸን እትባ ሎይላዳ፤ ኒቆላዎቱዎ ኦሱዎ፣ ታን እጽያዎ ኔንካ እጸዳ።

7 “ሰሳናዉ ሀይላይ ደእያ ኡራይ ጌሻ አያናይ ዎሳ ጎለቶ ግያዎ ሰሰ፤ ታን ጸንያ ኡራዉ ጸሳ ገነትያን ሞክያ ደኡዎ ሞላ አይፍያ ማናዉ እማና ያጌ”

---

1:17 አሳ. 44:6፤ 48:12፤ ሳፍ 2:8፤ 22:13 § 1:20 ኪታንቻቱዎ- ሀዎንታ ጉሳይ አማንያዎንታ ካለልያ ጭማቱዎ ዎይ አማንያዎንቶ ኪተቱዳዎንታ።

ያጋደ ጻፋ።

(2) የሱስ ሳምርኔሳን ደእያ ዎሳ ጎለው ጎዎ

8 ሳምርኔሳን ደእያ ዎሳ ጎለ ኪታንቻው ሀዋዲን ያጋደ ጻፋ።

“ሀይቄዳዌ፣ ሀይቄዎፕፕካ ደንዴዳዌ፣ ኮይሩነ ወርሰላይ ሀዋዲን ያገ።

9 ታን ነ ዋይያነ ነ ሀዌሳተላ ኤራይ፤ ሸን ኔን ዴራ። አይሁዳ ግደናን ደኢደ ባርንታ፣ ኑን አይሁዳ ግያዋንቱ ቦርያዎ ታን ኤራይ፤ ሸን ኡንቱንቱ ሴጻና ማባራን ደኢኖ።

10 ኔን ዋየታና ዋየወ ያዮፓ። በእ፣ ጸላህያ ካፑ ህንተፕ አማራዳዋንታ ጸዋሳናወ ቃሾ ጎለን የጋና፤ ታሙ ጋላሳ ጋካናወ ህንተንቱ ዋየታና። ሀይቃና ጋካናሰካ አማነቴዳዎ ግዳ፤ ታን ነወ ደኡዎ ካላቻ \* አማና።

11 “ሀይላይ ደእያ ኡራይ ጌሻ አያናይ ዎሳ ጎለቶ ግያዎ ሰሶ! “ጸንያ ኡራይ ላኤንሉዎ ሀይቄዎን † ቆሄተና ያገ።” ያጋደ ጻፋ።

(3) የሱስ ጳርጋዎናን ደእያ ዎሳ ጎለው ጎዎ

12 ጳርጋዎናን ደእያ ዎሳ ጎለ ኪታንቻው ሀዋዲን ያጋደ ጻፋ።

“ላኡ ባጋና ሌፊቴዳ ማሻይ ደእያዌ ሀዋዲን ያገ።

13 ታን ኔን ደእያ ሳኣ ኤራይ። ኔን ሴጻና ካወተላ ኦይዲ ደእያ ሳኣን ‡ ደኣሳ፤ ታ ሱንላ ሞንሳ ናጋሳ። ሀራይ አቶ፣ ሴጻናይ ደእያ ሳኣን ህንተንቱ ማታን አሳይ ዎጄዳ ታን አማንያ ማርካይ አንትጳስ ደእያ ዎደካ ታና አማንያዎ አጋ በይካ።

14 ሸን ታን ኔና ቦርያ ጉላባይ ደኤ፤ እሰራኤልያ አሳይ ኤቃወ ያርሼዳ ቁማ ማናዳንነ ዎሹማናዳን ኡንቱንታ ናጋራ ኦስሴዳ ባላቃ ታማርሴዳ ባላማ ትምርትያ ታማርያ አማራዳ አሳቱ ኔናና ደኢኖ።

2:7 ደመላ 2:9፤ ሳዩ 22:2፤ ህዝ. 28:13፤ 31:8 2:8 አሳ. 44:6፤ 48:12፤ ሳዩ 1:17፤ 22:13 \* 2:10 ደኡዎ ካላቻ፡- ቦንቹቴዳ ደኡዎ። † 2:11 ላኤንሉዎ ሀይቄዎ፡- ኮይር ሀይቄ አሹ ሸምፕፕፕ ሻከትያዎ ግደደ፣ ላኤንሉ ሀይቄ ሸምፕ መድናወ መቶቲደ ደእያ ሀይቄዎ። ‡ 2:13 ሴጻና ካወተላ ኦይዲ፡- ሀዋ ብለላይ ሎይሊደ ቆንጨ ግደና፣ ሸን ሀዌ በሰያዌ ጸሳ ኤራናን አጼዳዋንቱ ጎይንያ ጎይና ሳኣ ጋና ዳንዳየቱ። 2:14 ፓይ. 25:5፣ 7፤ 31:16፤ ዛረ. 23:4፤ ፓይ. 25:1-3

15 ሄዋዳንካ፣ ቃይ ኒቆላዋቱዋ ትምርትያ ታማርያ አሳቱ ኔናና ደኢኖ።

16 ሄዋ ድራው፣ ኔን ነ ናጋራፕ ሰማ፤ ሄዌ ቆየፕ፣ ታን ኔኮ ኤለካ ያና፤ ሄ አሳቱዋና ታ ደናፕ ከሰያ ማሻን ኦለታና።

17 “ ሳይላይ ደኢያ ኡራይ ጌሻ አያናይ ዋሳ ጎለቶ ግያዋ ሰሶ። ጸንያ ኡራው ታን ጌማን ደኢያ ማናፕ አማሬዳዋ አማና። ቃይ ታን ቦላ ሹቻካ አው አማና፤ አክያ ኡራፕ አትን፣ ኦንነ ኤረና ኡራላ ሱንላይ ሄ ሹቻ ቦላ ጸፈት ኡቴዳ’ ያጌ” ያጋደ ጸፋ።

**(4) የሱስ ትያጽርነን ደኢያ ዋሳ ጎለው ጎዋ**

18 ትያጽርነን ደኢያ ዋሳ ጎለያ ኪታንቻው ሀዋዳን ያጋደ ጸፋ። “ጸሳ ናአይ፣ ታማ ላጩዋ ማላትያ አይፊ ደኢያዌ፣ ቃይ ጩጩያ ታማን ቴሪደ ጸልያ ናሃሰያ ጌተትያ ብራታ ማላትያ ገዲ ደኢያዌ፣ ሀዋዳን ያጌ።

19 ታን ነ ኦሱዋ፣ ነ ሲቁዋ፣ ነ አማኑዋ፣ ነ ማዲዋን ነ ገንጨዋ ኤራይ፤ ኔን ኮይሮ ኦላያዋፕ ሀእ ዳርሳደ ኦላያዋ ታን ኤራይ።

20 ሸን ታን ኔና ካዲያባይ ደኤ፤ ባረና፣ ታን ናባቶ ያግያ ምሽራቶ ኤልዛቤሎ ሸነኮ ጋዳ፤ ሄ ምሽራታ ታ ኦሳንቻቱ ዋሹማናዳንነ ኤቃው ያርሼዳ ቁማ ማናዳን፣ ታማርሳውን ባለላው።

21 እዛ ባረ ናጋራፕ ሰማና ማላ፣ ታን እዝው ዋድያ አማድ፤ ሸን ዋሹማናው ካጄልያዋፕ እዛ ሰማናው ኮያበይኩ።

22 በአተ፣ ታን እዞ ግሱዋን ኩንድሰና፤ ሳኩዋን እዛ ዋየታና። እዝና ዋሹምያዋንቱ ሄ እዝና ኦላያ ናጋራፕ ሰማና ቆየፕ፣ ኡንቱንታካ ዋልቃማ ዋይያን የጋና።

23 ታን እዝ ናናካ ዋቆና፤ ቃይ ዋሳ ጎለያ ኡባይካ ታን አሳ ቆፋነ አሙዋ ኤርያዋ ግድያዋ ኤራና፤ ታን ሀንተንቶ ሀንተንቱ ኪታ ማላ አማና።

24 “ትያጽርነን ደኢያ ሀራቶ፣ ሀ ኢታ ትምርትያ ታማርቤናዋንቶ፣ ሀራቱ፣ ሴጸና ጨሞ የዉዋ ግያዋ ሀንተንቱ ታማርቤይክታ፤ ታን ሀንተንታ ሀራ ዴጹዋ ቶሰከ ጋይ።

25 ሸን ታን ያና ጋካናው ሀንተንቶ ደኢያዋ ሎይላ ናግተ።

26 “ጸኔዳዋን ዉርሰላይ ጋካናው፣ ታ ኪታ ናጌዳዎ፣ አሳ ዛርያ ኡባ ሞዳና ማላ፣ ታን ታ አዉዋፕ አኬዳ ማታ ማላ አዉ አማና፤

---

2:17 ከሳ 16:14-15፤ 16:33-34፤ የሃ. 6:48-50፤ ኢሳ. 62:2፤ 65:15 2:20 1 ካታ. 16:31፤ 2 ካታ. 9:22፣ 30 2:23 ማዝ. 7:9፤ ኤር. 17:10፤ ማዝ. 62:12

27 “እ አሳ ዛርያ ኡባ ብራታ ጸምኢን ሞዳና፡፡  
 ኡርቃፕ ሙታ ሚሻ ሙንሰያዋዳን ሙንላና፡፡  
 28 ቃይ ታን አዉ ባካልያ ጸልንትያ እማና፡፡  
 29 ሰሳናዉ ሀይላይ ደእያ ኡራይ ጌሻ አያናይ ዋሳ ጎለቶ ግያዋ  
 ሰሰ ያጌ”  
 ያጋደ ጻፋ፡፡

### 3

#### (5) የሱስ ሳርዴሳን ደእያ ዋሳ ጎለዉ ጎዋ

1 ሳርዴሳን ደእያ ዋሳ ጎልያ ኪታንቻዉ ሀዋዳን ያጋደ ጻፋ፡

“ጸሳ አያና ላፑናቱነ ላፑ ጸልንታቱ ደእያዌ ሀዋዳን ያጌ፡፡ ታን ነ ኪታ ኡራይ፤ አሳይ ኔና ሸምፑዋና ደአሳ ግንቶካ፡ ኔን ሀይቃዳ፡፡

2 ቤጎታ! አቲዳዋን ሀይቃናዉ ማቴዳዋ ሙንባ፡፡ አያዉ ጎፕ፡ ነ ኪታይ ታ ጸሳ ሰንላን ፖሎ ግደናዋ ታን ደማድ፡፡

3 ሰም ኔን አኬዳዋን ሰሴዳዋ አኬካ፤ ናጋ፤ ነ ናጋራፕካ ሰማ፡፡ ኔን ቤጎተናዋ ግድፕ፡ ታን ኔኮ ካይሱዋዳን ያና፤ ታን ዋይሳደ ያንንቶ ኔን ኡራካ፡፡

4 ሸን ባረንቱ ማዩዋ ቅትሰቤና አማሬዳ አሳቱ ሳርዴሳን ኔናና ደእኖ፡፡ ኡንቱንቱ ቦላ ማዩዋ ማዩደ ታናና ሀመታና፤ አያዉ ጎፕ፡ ኡንቱንቱ ቦላ ማዩዋ ማያናዉ በሰያዋንታ፡፡

5 ጸንያዌ ሄዋዳንካ ቦላ ማዩዋ ማያና፡፡ ታን አ ሱንላ ደኡዋ ማጻፋፕ \* ቁጭከ፤ ታን ታ አቡ ሰንላንነ አ ኪታንቻቱዋ ሰንላን አ ታዋ ግድያዋ ማርካታና፡፡

6 “ሰሳናዉ ሀይላይ ደእያ ኡራይ ጌሻ አያናይ ዋሳ ጎለቶ ግያዋ ሰሰ ያጌ”  
 ያጋደ ጻፋ፡፡

#### (6) የሱስ ፕላደልፍያን ደእያ ዋሳ ጎለዉ ጎዋ

7 ፕላደልፍያን ደእያ ዋሳ ጎልያ ኪታንቻዉ ሀዋዳን ያጋደ ጻፋ፡

---

2:27 ማዘ. 2:8-9 \* 3:5 ደኡዋ ማጻፋ፡- ጸሳ አሳቱዋ ሱንላይ ጻፈትያ ማጻፋ፡፡  
 3:5 ከሳ 32:32-33፤ ማዘ. 69:28፤ ሳፍ 20:12፤ ማቶሳ 10:32፤ ሉቃሳ 12:8

“ዳዊተ ቁልጥያ ተ ኦይቁዳዌ፣ ኦንነ ጎርዳናዉ ዳንዳየናዳን ደይያዌ፣ ቃይ ኦንነ ደያናዉ ዳንዳየናዳን ጎርድያዌ ጌሻይነ፣ ቱማንቻይ ሀዋዳን ያጌ።

8 ታን ነ ኪታ ኤራይ። በእ፣ ታን ነ ሰንፋን ኦንነ ጎርዳናዉ ዳንዳየና ጥንግያ ዋላድ፤ እያዉ ጎጥ፣ ነ ዋልቃይ ጉላ ግድጥነ፣ ታ ቃላ ናጋዳነ ታ ሱንፋካ ኤርከ ጋበይካ።

9 በእ፣ አይሁዳ ግድክኖ ሸን ባረና፣ ፉን አይሁዳ ጊደ ዋርዶትያ ሴጸና አይሁዳ ዋሳ ጎልያ ታን አሃድ፣ ነ ሰንፋን ጎይንጎናነ ኔና ሲቅያዋካ ኡንቱንታ ኤርሳና።

10 ኔን ገንጨዋን ታ አዛዙዋ ናጌዳ ድራዉ፣ ሳኣን ደእያ አሳ ፓጫናዉ ኩመንፋ ሳኣ ቦላ ይያ ዋይያ ዋድያጥ ታንካ ኔና ናጋና።

11 ታን ኤለካ ያና፤ ኦንነ ነ ካላቻ አከና ማላ፣ ነዉ ደእያዋ ሞንጎ አይቃ።

12 ታን ጸንያ ኡራ ታ አዉዋ ጌሻ ጎልያን ቱሳ ኦላና፤ እ ሄዋጥ ኡባካ ከሰና። ታን ታ ጸሳ ሱንፋ፣ ታ ጸሳ ካታማ ሱንፋነ ታ ጸሳ ማታጥ ዋላና ኡራላ የሩሳላመ ሱንፋ አ ቦላ ጸፋና። ቃይ ታን ታ ኡራላ ሱንፋካ አ ቦላ ጸፋና።

13 ሰሳናዉ ሀይላይ ደእያ ኡራይ ጌሻ አያናይ ዋሳ ጎለቶ ግያዋ ሰሶ ያጌ” ያጋደ ጸፋ።

(7) የሱሰ ሎዶቅያን ደእያ ዋሳ ጎለዉ ጎዋ

14 ሎዶቅያን ደእያ ዋሳ ጎልያ ኪታንቻዉ ሀዋዳን ያጋደ ጸፋ፡

“እማነቴዳ ቱማንቻ ማርካይ፣ ጸሳይ መዴዳዋ ኮይሩ፣ አመንእ ግያዌ ሀዋዳን ያጌ።

15 ታን ነ ኪታ ኤራይ። ኔን እርጸ ግዳካ፤ ዋይ ሴልያዋ ግዳካ፤ እርጸ ዋይ ሴልያዋ ግዳርኪ።

16 ኔን እርጸ ዋይ ሴልያዋ ግዳናን፣ ደምቦሎላ ግድያ ድራዉ፣ ታን ኔና ታ ደናጥ ጨቻና ሀናይ።

17 እያዉ ጎጥ ኔን፣ ፉን ዱረ፤ ሚሻና ደእይ፤ ታና አይነ ኮሸና ያጋሳ። ሸን ኔን መቶትያ አሳ፣ ቃረላያ አሳ፣ ሀዬሳ፣ ቆቃነ ካሎቴዳ አሳ ግድያዋ ኤራካ።

† 3:7 ዳዊተ ቁልጥያ፡- ሀዋ ጉሳይ ዳዊተ ካዉተላ አይሱዋ ማታ ኦድያዋ። 3:7 ኢሳ. 22:22፤ ኢዮባ 12:14 3:9 ኢሳ. 49:23፤ 60:14፤ 43:4



18 ሄዋ ድራው፣ ኔን ዲረታና ማላ፣ ታማን ጌዬዳ ዋርቃ፣ ኔና ዬላይያ ነ ካሉዋ ካማናው ቦላ ማዩዋነ ቃይ ሎይላ ይላናው ነ ኦይፍያ ኦክያ ቆልያ ታፕ ሻማናዳን፣ ታን ኔና ዘራይ።

19 ታን ሲቅያ ኡባ ሴራይነ ሙራይ፤ ሰሞ ሎይላ ሴለታ፤ ነ ናጋራፕካ ሰማ።

20 በእ፣ ታን ካረን ኤቃደ ይሳይ። ኦንነ ታን ይሰያዋ ሰሲደ፣ ካርያ ዶዮፕ፣ ታን እኮ ገላደ አናና እትፕ ካወዋ ማና፤ እካ ታናና እትፕ ማና።

21 ቃይ ታን ጸናደ ታ አወዋና አ ካወተላ ኦይድያን ኡቴዳዋዳን፣ ጸንያ ኡራዉ ታናና ታ ካወተላ ኦይድያን ኡትያ ማታ እማና።

22 “ሰሰያ ሀይላይ ደእያ ኡራይ ጌሻ አያናይ ዋሳ ጎለቶ ግያዋ ሰሶ ያጌ ያጋደ ጸፋ” ያጌዳ።

# 4

## ጸሳይ የሃንሳ ባረ ካወተላ ኦይድያ ሰንላ እሄዳ

1 ሄዋፕ ጉይያን፣ ታን ሳሉዋን ዶያ ፐንግያ በኣድ፤ ቃይ ታዉ ማላካታዳን ኦድሽን፣ ታን ሰሴዳ ኮይር ኮሻይ ታና፤ “ሀዋፕ ጉይያን፣ ሀናናዉ በሰያዋ ታን ኔና በሳና፤ ሃ ከሳ” ያጌዳ።

2 ኤለካ ታን ጌሻ አያና ዋዴዋ ግዶ ገላ አጋድ። በእተ፣ ሳሉዋን ካወተላ ኦይዲ ደኤ፤ ሄ ኦይድያን እቱ ኡቴዳ።

3 ሄ ኡቴዳዋ ማላይ አልእ እያሰጺድያ ሹቻዳንነ አልእ ሰርድኖነ ሹቻዳን ጸሌ። ካወታ ኦይዲ ዙሉዋን ዩይ አጺደ ኡባ ባጋና አልእ ማርግድያ ሹቻዳን ጸሌ።

4 ሄ ካወተላ ኦይድያ ዩይ አጺደ፣ ሀራ ላታማነ ኦይዲ ካወተላ ኦይደቱ ደኤኖ፤ ኡንቱንቱን ቦላ ማዩዋ ማዩደ፣ ሁጺያን ዋርቃ ካላቻ ዋጭዳ ላታማነ ኦይዲ ጭማቱ ኡቴድና።

5 ካወተላ ኦይድያፕ ዋልቃንላይ፣ ከሹንቻይነ ጉጉንላ ጉንላይ ከሴዳ፤ ቃይ ካወተላ ኦይድያ ሰንላን ላፑ ጸሞፓቱ ፖኢና። ሄዋንቱ ጸሳ ላፑ አያናቱዋ።

6 ካወተላ ኦይድያ ሰንላን ብርልያ ማላትያ ቡርጨኩዋ አባይ ደኤ።

---

3:19 ለሞ. 3:12፤ እብራ. 12:6    4:2 ህዝ. 1:26-28፤ 10:1    4:5 ከሳ 19:16፤ ሳፃ 8:5፤ 11:19፤ 16:18፤ ህዝ. 1:13፤ ሳፃ 1:4፤ ዛካ. 4:2    4:6 ህዝ. 1:5-10፤ 10:14

ሄ ካወተላ ኦይድያፕ ሰንሳናን ጉየና ኦ ማታን ዩይ ኦዲድ፤  
ኦይፊ ኩሜዳ ኦይዱ ደኡዋን ደእያ መታቱ ደኡኖ።

7 ኮይሮ ደኡዋን ደእያ መታቱ ጋሙዋ ማላቴ፤ ላኤንሉ ሚዛ ማራ ማላቴ፤ ሄዘንሉዋ ሶምእ ኦሳ ዴሙዋ ማላቴ፤ ቃይ ኦይደንሉ ፓልያ ኦርጋንሳ ማላቴ።

8 ኦይዱ ደኡዋን ደእያ መታቱ ሁጲያን ሁጲያን ኡሱፑን ቀፊ ደኤ፤ ኡንቱንቶ ቦላን ጋርሳንካ ኡባ ሳን ኦይፊ ኩሜዳ።  
ኡንቱንቱ ቃማን ጋላስ።

“ጌሻዉ፡ ጌሻዉ፡ ጌሻዉ፡  
ካሰ ደእያዎ፡ ሀእካ ደእያዎ፡  
ቃይ ሰንሳፕ ያናዎ፡  
ኅዳዉ፡ ኡባፕ ዋልቃማ ጸሳዉ”

ግያዋ ኦግክኖ።

9 ሄ መታቱ ካወተላ ኦይድያን ኡቴዳ መጅ መጅናዉ ደኡዋን ደእያዋ ማዘሙርያን ሳቤዳ ዋደ፤ ቦንቼዳ ዋደን ጋላቴዳ ዋደ፤

10 ላታማን ኦይዱ ጭማቱ ካወተላ ኦይድያን ኡቴዳ መጅ መጅናዉ ደእያዋ ሰንሳን ጉፋኒድ፤ ኦዉ ኅይኒኖ፤ ባርንቱ ካላቻ ካወተላ ኦይድያ ሰንሳን ዋሊደ ሀዋዳን ያጊኖ።

11 “ኑ ኅዳዉ ጸሳዉ፡  
ኔን ቦንቼዋ፡  
ሳባን ዋልቃ ኦካናዉ በሳሳ።  
እያዉ ኅፕ፡ ኡባባ ኔን መጳዳ፤  
ቃይ ኡባባይካ፡ ኔን ኮዬዳዋዳን ሀኔዳን ደኤዳ”  
ያጊኖ።

# 5

## ማጻፋን ደርሳ

1 እት ጸጸቶ ማጻፋይ \* ካወተላ ኦይድያን ኡቴዳዋ ኡሸቻ ኩሸያን ደእያዋ በኦድ፤ ሄ ጸጸቶ ማጻፋይ ላኡ ባጋናካ ጸፈት ኡቴዳ፤ ቃይ ላፑ ማታፋይ ኦ ቦላ ኦታመቴዳ።

2 ታን እት ዋልቃማ ኪታንቻይ ባረ ቃላ ጶቁ ኦሊድ፤ “ማታፋ ደዪድ፤ ጸጸቶ ማጻፋ ብላናዉ በሰያ ኡራይ ኦኔ?” ያጊድ፤ ኦዋይያዋ በኦድ።

---

4:8 ሀዘ. 1:18፤ 10:12፤ ኦሳ. 6:2-3 \* 5:1 ጸጸቶ ማጻፋ- ሀዋ ጉሳይ ዋራቃታን ዋይ ጋልባን ጸፈቴዳ ጸጸትያ ማጻፋ ግዲድ፤ ዳር ካረ ባጋና እት ዋይ ላኡ ቦላ ባጋ ጋልባን ማታፋይ ኦታመቴ። 5:1 ሀዘ. 2:9-10፤ ኦሳ. 29:11

3 ሳሉዋን ግድና ወይ ሳኦን ግድና፣ ወይ ሳኦፕ ጋርሳን ተ ግድና፣ ሄ ጸጸቶ ማጸፋ ብላናው ወይ ኦ ግዲዋ ጴላናው ኦንን በሰያዌ ባዋ።

4 ጸላ ማጸፋ ብላናው ወይ ኦ ግዲዋ ጴላናው በሰያ ኡራይ ባይና ድራው፣ ታን ዳር ዬካድ።

5 ጭማቱዋፕ እቱ ታና፣ “ዬኮፓ፤ በእ፣ ይሁዳ ዛርያ ግዴዳ ጋሙ፣ ዳዊተ ዛሪ ጸኔዳ። እ ማታፋ ደያናውን ጸጸቶ ማጸፋ ብላናው በሴ” ያጌዳ።

6 ታን ካውተላ ኦይድያፕ፣ ደኡዋን ደእያ ኦይዱ መፍታቱዋፕን ቃይ ጭማቱዋፕ ግዲዋን፣ ሹከቱዳ ዶርሳ ማላቲደ ኤቄዳዋ በእድ፤ እው ላፑ ካጨቱን ላፑ ኦይፊቱ ደእኖ። ሄዋንቱ አላምያ ኡባ ኪተቱዳ ጸሳ ላፑ አያናቱዋ።

7 ሄ ዶርሳይ ቢደ፣ ካውተላ ኦይድያ ቦላ ኡቱዳዋ ኡሸቻ ኩሸያፕ ጸጸቶ ማጸፋ አኬዳ።

8 እ ሄ ጸጸቶ ማጸፋ አኬዳ ዋደ፣ ደኡዋን ደእያ ኦይዱ መፍታቱን ላታማን ኦይዱ ጭማቱ አ ሰንላን ኩንዴድና። ኡንቱንቱ ሁጲያን ሁጲያን ዲላን እጻናይ ኩሜዳ ዋርቃ ሚሻ ኦይቄድና። ሄ እጻናይ ጌሻቱ ጸሳ ዋሰያዋ።

9 ኡንቱንቱ፣  
“ጸላ ማጸፋ አካናውን፣  
ማታፋ ደያደ፣  
ጴላናው ነው በሴ።  
አያው ጎፕ፣ ኔን ሹከታዳ።

ኔን ቆሙዋ ኡባፕ፣  
ዲማ ዲማ ጋድያ ቃላ ኡባፕ፣  
ያራ ኡባፕን፣ ዛርያ ኡባፕ፣  
ነ ሱላን፣ ጸሳው አሳ ዋዛዳ።

10 ኦ ጸሳው አላና ማላ፣  
ኡንቱንታ ኔን፣ ካታቱዋን፣  
ቄሳቱዋ አላዳ።  
ቃይ ኡንቱንቱ ሳኦንካ ሞዳና”  
ያጊደ ኡራሳ ማዝሙርያ የጸኖ።

† 5:3 ሳኦፕ ጋርሳን፦ ሀይቁዳዋንታ ጉሳ። 5:5 ዶሙላ 49:9፤ እሳ. 11:1፣  
10 5:6 እሳ. 53:7፤ ዛካ. 4:10 5:8 ማዝ. 141:2 5:9 ማዝ. 33:3፤  
98:1፤ እሳ. 42:10 5:10 ከሳ 19:6፤ ሳፃ 1:6

11 ሄዋጥ ጉይያን፣ ታን ጸላደ፣ ካወተላ ኦይድያ፣ ደኡዋን ደእያ ኦይዱ መጠታቱዋን ጭማቱዋ ዩይ ኦይድ ኤቄዳ ዳር ኪታንቻቱዋ ኮሻ ሰሳድ፤ ኡንቱንቱ ሻኣንን ሚሎንያን ፓይደቲድኖ።

12 ሄ ኪታንቻቱ ባረንቱ ቃላ ቶቄ ኦሲድ፡

“ሹከቲዳ ደርሳይ  
ዎልቃ፣ ዱረተላ፣  
ኦይዳ ኤራ፣  
ምኖተላ፣  
ቦንቹዋ፣ ሳባ፣  
ጋላታ ኦካናዉ በሴ!”

ያጌድኖ።

13 ሄዋጥ ጉይያን፣ ሳኣን፣ ሳሉዋን፣ ሳኣጥ ጋርሳንን ኦባ ግዱዋን ደእያ መጠታ ቡባይን ቃይ ሄዋንቱን ደእያ መጠታ ኡባይ፡

“ካወተላ ኦይድያ ቦላ፣  
ኡቲዳዎን ደርሳዉ፣  
ጋላታይ፣ ቦንቹ፣  
ሳባይን ዎልቃይ፣  
መጵ መጵናዉ ግደ!”

ያጌደ የጽሽን ሰሳድ።

14 ደኡዋን ደእያ ኦይዱ መጠታቱ፣ “ኦመንኦ” ያግና፣ ጭማቱ ጉፋኒደ ጎይኔድኖ።

# 6

## ሄ ጸጸላ ማጸፋ ማታፋ ደያ

1 ደርሳይ ላፑ ማታፋቱዋጥ እቱዋ ደይሽን በኦድ፤ ቃይ ሸምፑዋና ደእያ ኦይዱ መጠታቱዋጥ እቱ ጉጉንላ ጉንላ ማላትያ ኮሻን፣ “ሃያ!” ያግያዋ፣ ታን ሰሳድ።

2 ታን እት ቦላ ፓራ በኦድ። ሄ ፓራ ቶጌዳዌ ዎንዳፍያ ኦይቄዳ፤ ቃይ ኦዉ ካላቻይ እመቲዳ። ኦላ እ ጸኒድን ቃይካ ጸናናዉ ከሴዳ።

3 ደርሳይ ላኤንሎ ማታፋ ደዬዳ ዎደ፣ ሸምፑዋና ደእያ መጠታቱዋ ላኤንሎ፣ “ሃያ!” ያግያዋ፣ ታን ሰሳድ።

4 ቃይ ሀራ ዳማ ፓራይ ከሴዳ። ኦሳይ እቱ እቱዋና ሹከታና ማላ፣ ሄ ፓራ ቶጌዳዎ ሳኣን ሳርተላ ድግያ ዎልቃይ እመቲዳ። ዎጋ ማሻይ ኦዉ እመቲዳ።

5 ደርሳይ ሄዘንሉ ማታፋ ዶዬዳ ዎደ፡ ደኡዎን ደእያ መጠታቱዎ ሄዘንሉ፡ “ሃያ!” ያግያዎ፡ ታን ሰሳድ። ያታደ ካረፋ ፓሪይ ከሴዳዎ በኣድ፤ ቃይ ሄ ፓሪ ቶጌዳዌ ባረ ኩሽያን ሚዛንያ ኦይቄዳ።

6 ታን ደኡዎን ደእያ ኦይዱ መጠታቱዎ ግድፕ ኮሻ ማላትያባ ሰሳድ። ሄ ኮሻይ፡ “እት ጋላሳ ኦሶ ድርጉ ባጋ ኪሉዎ ዛርጋ፤ ቃይ እት ጋላሳ ኦሶ ድርጉ እት ኪሉዎ ባጋ ባንጋ። ሸን ዛይትያን ዎይንያ ኤሳ ቆሆፓ” ያግያዎ ሰሳድ።

7 ደርሳይ ኦይደንሉ ማታፋ ዶዬዳ ዎደ፡ ደኡዎን ደእያ መጠታቱዎ ኦይደንሉ፡ “ሃያ!” ያግያዎ፡ ታን ሰሳድ።

8 ታን ግራጨ ፓሪይ ከሴዳዎ በኣድ። ሄ ፓሪ ቶጌዳዎ ሱንላይ ሀይቄዎ፤ እ ጌዱዎ ሰኦሊ ካሌዳ። ሀይቄን ሰኦሊ ሳኦፕ ኦይደንሉ ኩሽያ ኦላን፡ ኮሻን፡ ሀርግያን፡ ደኣን ዎድሳና ማላ፡ ኡንቱንቶ ማታይ እመቲዳ።

9 ደርሳይ እቺሸንሉ ማታፋ ዶዬዳ ዎደ፡ ኡንቱንቱ ጸሳ ቃላ ኦዳዳ ድራዉን ባረንቱ ማርካተላን አማነቲዳ ድራዉ፡ ሹኬዳ አሳ ሸዎቸዎ ያርሹዎ ያርሸያ ሳፕ ጋርሳን በኣድ።

10 ኡንቱንቱ ባረንቱ ቃላ ጶቄ ኦሊደ፡ “ኡባ ዎድያ ጎዳዉ፡ ጌሻዉ፡ ቱማንቻዉ፡ ሳኣን ደእያ አሳ ቦላ አዉደ ፕርዳይ? ቃይ ኑ ሱላ አዉደ ጭገታይ?” ያጌድኖ።

11 ኡንቱንቶ ሁጲያን ሁጲያን ቦላ ማዩ እመቲዳ። ኡንቱንቱዎዳን ሀይቃናዉ በሰያ ኡንቱንቱ ላገላ ኦሳንቻቱዎ ፓይዱን ኡንቱንቱ እሻቱዎ ፓይዱ ኩማና ጋካናዉ፡ ኡንቱንቱ አማሬዳ ዎድያ ታክሻና ማላ፡ ኡንቱንቶ ኦይቲዳ።

12 ደርሳይ ኡሱፑንላ ማታፋ ዶዬዳ ዎደ፡ ታን በኣድ፤ ቢታይ ሎይሐ ቃጾዳ። አዎይሬ ካረፋ ማዩዎዳን ካረጾዳ፤ አገናይካ ሙላ ሱላ ማላቲዳ።

13 ባላሰያ ግያ ዎላት ጋዎኤ አይፊ፡ ዎልቃማ ጫርኩ ቃላና፡ ሳኣን ቆቆፈትያዎዳን፡ ጸልንታቱ ሳሉዎፕ ሳኣን ቆቆፈቲድኖ።

14 ሳሉ ጸጸቶ ማጸፋይ ጸጸትያዎዳን፡ ጸጸቲደ ቆይ አጌዳ፤ ደር ኡባቱን ሃላን ደደቲዳ ሳኣይ ኡባይ ባረንቱ ደኢያሳፕ ክቶ አጌድኖ።

15 ሄዎፕ ጉይያን፡ ሳኣ ካታቱ፡ ደርያ ዎድያዎንቱ፡ ሻላቃቱ፡ ዱራቱ፡ ዎልቃማቱ፡ ቃይ ሀራ አሳይ ኡባይ፡ አይለቱ፡ ዎማናቱ፡

ደርያ ከሲድ፣ ጎንጎሉዋ ግድን ደርያን ደእያ ዛላ ጉዩ ባጋን ቆሰቲድኖ።

16 ያቲደ ደረቱዋን ሹቻ፡ “ካወተላ ኦይድያን ኡቲዳዋ ኦይፍያፕነ ደርሳ ሀንቁዋፕ ኑ ቦላ ኩንዲድ፣ ኑና ገንፊርክቲሻ!

17 ኦያዉ ሳፕ፡ ኡንቲንቶ ዋልቃማ ሀንቁዋ ጋላሳይ ጋክ ክቼዳ፤ ሄ ሀንቁዋ ዳንዲያናዌ ኦኔ?” ያጌድኖ።

# 7

እስራኤልያ አሳፕ 144,000 አሳቱዋ ሶምእያን ማታፋይ ዋዴዳ

1 ሄዋፕ ጉይያን፣ ታን ኦይዲ ኪታንቻቱ ኦይዲ ባጋ ሳኦ ጋጸን ኤቁዳዋንታ በኦድ። ሄ ኪታንቻቱ ሳኦ ቦላን፣ ዋይ አባ ቦላን፣ ዋይ አይ ሞላ ቦላን፣ ጫርኩ ጫርከናዳን ተኤድኖ።

2 ቃይካ ደኡዋ ጸሳ ማታፋ ኦይቂደ ሀራ ኪታንቻይ አዋይ ሞክያሳፕ ከሰያዋ ታን በኦድ። ሄ ኪታንቻይ ባረ ኮሻ ቶቁ ኦሴድ፣ ሳኦ አባ ቆሀናዉ ዋልቃይ እመቲዳ ኦይዲ ኪታንቻቱዋ

3 ጸሲድ፣ “ኑ ጸሳ ኦሳንቻቱዋ ዴሙዋን ኑን ማታፋ ዋላና ጋካናዉ፣ ሳኦ ግድና ዋይ አባ ግድና፣ ዋይ ሞላ ግድናካ ቆሆፕፕ” ያጌዳ።

4 ታን ጸሳ ማታፋ ዴሙዋን ዋሴዳዋንቲ ፓይዲዋ ሰሳድ። እስራኤልያ ዛርያ ኡባፕ እት ጸታነ ኦይታማነ ኦይዲ ሻኦ አሳቱዋ ዴሙዋን ማታፋይ ዋዴዳ።

5 ይሁዳ ዛርያፕ፡

ታማነ ላኡ ሻኦ ዴሙዋን ማታፋይ፡

ዋዴዳ።

ሮቤላ ዛርያፕ፡

ታማነ ላኡ ሻኦ።

ጋይ ዛርያፕ፡

ታማነ ላኡ ሻኦ።

6 አሴራ ዛርያፕ፡

ታማነ ላኡ ሻኦ።

ንፍታሌመ ዛርያፕ፡

ታማነ ላኡ ሻኦ።

ሞናሰ ዛርያፕ፡

---

6:15 አሳ. 2:19፣ 21    6:16 ሆሰ 10:8፤ ሉቃሳ 23:30    6:17 አጼ. 2:11፤  
ሚልክ. 3:2    7:1 ኤር. 49:36፤ ዲኔላ 7:2፤ ዛካ. 6:5    7:3 ሀዘ. 9:4፣ 6

ታማነ ለኡ ሻኦ።  
 7 ሰሞና ዛርያፕ  
 ታማነ ለኡ ሻኦ።  
 ሌዊያ ዛርያፕ  
 ታማነ ለኡ ሻኦ።  
 ይሳኮራ ዛርያፕ  
 ታማነ ለኡ ሻኦ።  
 8 ዛብሎና ዛርያፕ፤  
 ታማነ ለኡ ሻኦ።  
 ዮሴፎ ዛርያፕ፤  
 ታማነ ለኡ ሻኦ።  
 ቢንያማ ዛርያፕ፤  
 ታማነ ለኡ ሻኦ  
 ዴሙዋን ማታፋይ፤  
 ዋዴዳ።

ቦላ ማዩዋ ማዬዳ ጮራ አሳቱዋ

9 ሄዋፕ ጉይያን፣ ዛርያ ኡባፕ፣ ቆሙዋ ኡባፕ፣ ያራ ኡባፕን  
 ዲማ ዲማ ጋድያ ቃላ ኡባፕ ኦንነ ፓይዳናዉ ዳንዳዮና ዛዋይ  
 ባይና ጮራ አሳ ታን በኦድ። ሄ አሳይ ቦላ ማዩዋ ማዬዳ፣ ዛሞባ  
 ሀይላ ባረንቱ ኩሽያን ኦይቂደ፣ ካዉተላ ኦይድያ ሰንላንነ ዶርሳ  
 ሰንላን ኤቄዳ።

10 ኡንቱንቱ ባረንቱ ቃላ ቶቄ ኦሲደ፣  
 “ኦ አቶተላይካ፣  
 ካዉተላ ኦይድያን ኡቴዳ፣  
 ኦ ጸሳፕነ ዶርሳፕ ዬ”

ያጌድኖ።

11 ኪታንቻቱ ኡባይ ካዉተላ ኦይድያ፣ ጭማቱዋን ደኡዋን  
 ደእያ ኦይዱ መታ ዩይ አዲደ ኤቄድኖ። ኡንቱንቱ ካዉተላ  
 ኦይድያ ሰንላን ባረንቱ ዴሙዋን ጉፋኒደ ጸሳዉ ጎይኒደ፣

12 “አመንእ!  
 አንጂ፣ ቦንቹ፣  
 አዴዳ ኤራተላይ፣  
 ጋላታይ፣ ሳባይ፣  
 ዋልቃይ፣ ሞኖተላይ፣  
 መድናፕ መድና ጋካናዉ ኦ ጸሳዉ ግዶ።

አመንእ!”  
 ያጌድኖ።

13 ጭማቱዋጥ እቱ ታና፡ “ሀ ቦላ ማዩዋ ማዬዳ አሳቱ ኮኔ?  
ኡንቱንቱ ሀቃጥ ዬድኖ?” ያጊደ ኦቼዳ።

14 ታን፡ “ታ ጎዳዉ፡ ኔን ኤራሳ” ያጋድ። እ ታና ሀዋዲን ያጌዳ።

“ሀዋንቱ ዳር ዋይያ ዋየቲደ ዬዳዋንታ።  
ኡንቱንቱ ባረንቱ ማዩዋ ዶርሳ ሱላን ሜጨደ፡  
ቦጼዳዋንታ።

15 ሄዋ ድራዉ፡  
ኡንቱንቱ ጸሳ ካዉተላ ኦይድያ ሰንላን ኤቂደ፡  
ቃማነ ጋላሰ፡ አ ጌሻ ጎልያን፡  
እዉ ኦሲኖ።

ቃይ እ ባረ ካዉተላ ኦይድያን ኡቴዳዌ፡  
ኡንቱንቱ ግዱዋን ደአና።

16 ሀዋጥ ሰንላናዉ ኡባካ፡  
ኡንቱንቱ ኮሻትክኖ፤  
ዋይ ሳመትክኖ።  
አዋይ ኡንቱንታ ሜና፤  
ቃይ አይ ሴላይካ ኡንቱንታ ጉደና።

17 አያዉ ጎጥ፡ ካዉተላ ኦይደዉ፡  
ግዱዋን ኡቴዳ ዶርሳይ፡  
ኡንቱንታ ሄማና።  
ደኡዋ ሃላ ፑልቱዋኮካ፡  
ኡንቱንታ ካለላና።  
ጸሳይካ ኡንቱንቱ አይፍያ አፎላ ኡባ ቁጭ ድጋና”  
ያጌዳ።

# 8

## ጸጸላ ማጻፋ ላፑንላ ማታፋይ ደየቲዳ

1 ዶርሳይ ላፑንላ ማታፋ ዶዬዳ ዋደ፡ ባካ ሳትያ ግድያዋ ኬና ሳሉ ጮኡ ጌዳ።

2 ሄዋጥ ጉይያን፡ ታን ላፑ ኪታንቻቱዋ ጸሳ ሰንላን ኤቂያዋንታ በኦድ፤ ኡንቱንቶ ላፑ ማላካታይ እመቲዳ።

3 እጻና ጩዋይያ ዋርቃ ሚሻ ኦይቄዳ ሀራ ኪታንቻይ ዪደ፡ ያርሽያ ሳ ማታን ኤቄዳ። ዋርቃጥ መፀቲዳ ያርሽያሳይ ካዉተላ

7:14 ዳኔላ 12:1፤ ማቶሳ 24:21፤ ማር. 13:19 7:16 ኢሳ. 49:10 7:17 ማዝ. 23:1፣ 2፤ ህዝ. 34:23፤ ኢሳ. 49:10፤ 25:8



አይድያ ሰንፋን ደኤ፤ ሄ ያርሽያ ሳ ቦላ ጌሻ ኡባቱዋ ዋሳ ጉጃና ማላ፡ ኪታንቻው ዳር እጻናይ እመቲዳ።

4 እጻና ጩዋይ ጌሻቱዋ ዋሳና እትፕ ሄ ኪታንቻ ኩሽያፕ ፑደ ጸሳኮ ቤዳ።

5 ሄዋፕ ጉይያን፡ ኪታንቻይ እጻና ጩዋይያዋ አኪደ፡ ያርሽያ ሳፕ ታማ ቦንቁዋ አኪደ፡ እን ኩንጤዳ። ሄ እጻና ጩዋይያዋ ዲገ ሳአ አልና፡ ጉጉንፋይ ጉሜዳ። ዋልቃንፋይ ዋልቃሜዳ፤ ቃይ ቢታይካ ቃጾዳ።

**ማላካታቱ ፑነቴድኖ**

6 ቃይ ላፑ ማላካታ አይቂደ ላፑ ኪታንቻቱ ማላካታ ፑናናው ጊጌድኖ።

7 ኮይድ ኪታንቻይ ባረ ማላካታ ፑንና ሱፋና ዋላከቴዳ ሻቻይነ ታማይ ሳአን ቡኩዳ። ሳአፕ ሄዘንፋ ኩሺ ጉደቴዳ፤ ሞላፕካ ሄዘንፋ ኩሺ ጉደቴዳ፤ ማታ ኡባይካ ጉደቴዳ።

8 ላኤንፋ ኪታንቻይካ ባረ ማላካታ ፑኔዳ። ዋልቃማ ደርያ ማላትያባይ ታማን ኤጲደ፡ አባን የገቴዳ፤ ያትና፡ አባፕ ሄዘንፋ ኩሺ ሱፋ ግዴዳ።

9 አባን ደኡዋን ደእያ መታቱዋ ሄዘንፋ ኩሺ ሀይቄዳ፤ ማርካብቱዋፕካ ሄዘንፋ ኩሺ ጳዬዳ።

10 ሄዘንፋ ኪታንቻይ ባረ ማላካታ ፑንና ሻፋፕን ፑልቱዋ ሃላፕ ሄዘንፋ ኩሽያ ቦላ ሳሉዋፕ ጸምፕያዳን ኤጵያ ዋልቃማ ጸልንቲ ዋዴዳ።

11 ሄ ጸልንትያ ሱንፋይ ጫሙዋ ጌተቴ። ሃላፕ ሄዘንፋ ኩሺ ጫሜዳ፤ ቃይ ሃላይ ጫሜዳ ድራው፡ ዳር አሳይ ሄ ሃላ ኡሺደ ሀይቄዳ።

12 አይደንፋ ኪታንቻይ ባረ ማላካታ ፑኔዳ። አዋፕ፡ አገናፕን ጸልንትያፕ ሄዘንፋ ኩሺ ደሽቴዳ፤ ኡንቱንቱ ፖኡዋፕካ ሄዘንፋ ኩሺ ጳሜዳ። ሄዋ ድራው፡ ጋላሳፕ ሄዘንፋ ኩሺ፡ ቃማፕካ ሄዘንፋ ኩሺ ጳሜዳ።

13 እት እርጋንፋይ ሳሉዋን ፓልያዋ ታን ቦአድ። ሄ አርጋንፋይ ባረ ቃላ ቶቁ ኦሊደ፡ “ሄዙ ኪታንቻቱ ፑናና ቦስያ የኮ ማላካታይ

---

8:3 አዋጸ 9:1፤ ከሳ 30:1፣ 3      8:5 ሳፃ 11:19፤ 16:18፤ ዋጋ 16:12፣ 18፤ ሀዘ. 10:2፤ ከሳ 19:16      8:7 ከሳ 9:23-25፤ ሀዘ. 38:22      8:10 ኢሳ. 14:12      8:11 ኤር. 9:15      8:12 ኢሳ. 13:10፤ ሀዘ. 32:7፤ እጸ. 2:10፣ 31፤ 3:15

ጉንትያ ዎደ፣ ሳኣን ደእያ አሳዉ አዬር! አዬር! አዬር!” ያግያዎ ሰሳድ።

# 9

1 ሄዋጥ ጉይያን፣ እቼሸንሎ ኪታንቻይ ባረ ማላካታ ጉንና ሳሎዋጥ ዱገ ሳኣ ኩንዴዳ ጸልንትያ በኣድ። ሄ ጸልንተዉ ጨዋ ኦላ \* ቁልፒ እመቲዳ።

2 ጸልንቲ ጨዋ ኦላ ደዬዳ፤ አኮ ጮጭያጥ ከሰያ ጩዋ ማላ ጩዋይ ሄ ጨዋ ኦላጥ ከሴዳ። ቃይ አዋይነ ሳኣይ ሄ ጨዋ ኦላጥ ከሴዳ ጩዋን ጹሜድኖ።

3 ጩዋጥ ቦሊ ዱገ ሳኣ ዬዳ። ሳኣን ደእያ ሶጋቶ ደእያ ዎልቃ ማላ ዎልቃይ ቦለዉካ እመቲዳ።

4 ጸሳ ማታፋይ ዳሙዋን ባይና አሳ ጸላላ ቆሀናጥ አትን፣ ሳኣን ደእያ ማታ ዎይ አጭያ ሞላ ግድና ዎይ አይ ሞላ ግድናካ ቆሄና ማላ፣ ቦለዉ አደቲዳ።

5 ቦሊ ሄ አሳ እቼሹ አገና ግድያዎ ፓጸ ካእና ማላ፣ ማታይ እመቲዳዋጥ አትን፣ አዉ አሳ ዎቆናዉ ማታይ እመትቤና። ሶጉ አሳ ዱኪደ ሴልሰያዎ ኬና ቦሊ ሴልሴ።

6 ሄ ጋላሳቱዋን አሳይ ሀይቁዎ ኮያና፤ ሸን ደመና። ቃይ ሀይቃናዉካ አሞታና፤ ሸን ሀይቁ አሳጥ ባቃታና።

7 ቦሊ ኦላዉ ጊግ ኡቲዳ ፓራ ማላቲ። ቦልያ ሀጺያን ዎርቃ ማላትያ ካላቻይ ደኤ፤ አ ዳሙካ አሳ ዳሙዋ ማላቲ።

8 አ ብናናይካ ማጫ አሳ ብናናይዳ አዱቁ፤ አ አቻይካ ጋሙዋ አቻ ማላቲ።

9 አ ትራይ ብራታን ኦሌዳ ጎንዳልያ ማላትያዋን ጎዘት ኡቲዳ፤ ቃይ አ ቀፍያ ኮሻይ ኦላ ባናዉ ፕሪጽያ ፓራቲ ጎቻያ ጋርያ ኮሻ ማላ።

10 አዉ ሶጉዋ ዱፍያ ማላትያ ዱፊ ደኤ፤ አ ዱፍያን ዱክያባይ ደኤ። ሄ ዱፍያን እቼሹ አገና ግድያዎ አሳ ቆሀናዳን፣ አዉ ማታይ እመቲዳ።

---

\* **9:1 ጨዋ ኦላ-** ሀዋ ጉሳይ ጋርሳ ባጋ ቢታን ዳርሰ ጨማቲደ ደእያ ኢታ እያናቲ ባረንቲ ዉርሰሳ ሙራ ጋላሳይ ጋካናዉ ቃሸቲደ ደእያሳ። **9:2 ደመላ** 19:28 **9:3 ከሳ** 10:12-15 **9:4 ሀዘ.** 9:4 **9:6 ኢዮባ** 3:21፤ ኤር. 8:3 **9:7** ኢዩ. 2:4 **9:8** ኢዩ. 1:6 **9:9** ኢዩ. 2:5

11 እ ሞድያ ካቲ ደኤ። ሄ ካቲ ጨዋ ኦላ ኪታንቻ። ኦ ሱንገላይካ እብራይስጸ ቃላን አብደና፤ ቃይ ግሪከ ቃላን አጸልዮና ጌተቱ። አጸልዮና ግያዎ ብለላይ፤ ጳይሰያዎ ግያዎ።

12 ኮይሮ አዬሮ ግያዌ አጴዳ፤ በእ፥ ብሮ ሀራ ላኡ አዬሮ ግያዌ ያናዎ።

13 ኡሱፑንጎላ ኪታንቻይ ባረ ማላካታ ፑኔዳ። ጸሳ ሰንገላን ኤቄዳ ዋርቃፕ መጴዳ ያርሽያሳን ደእያ ኦይዱ ጋጸ ካጨቱዋፕ እት ኮሻ ሰሳድ።

14 ሄ ኮሻይ ማላካታይ ደእያ ኡሱፑንጎላ ኪታንቻ፥ “ኤፍራዲሳ ግያ ዋጋ ሻፋን ቃሽቱዳ ኦይዱ ኪታንቻቱዋ ብላ” ያጌዳ።

15 አሳ ዛርያፕ ሄዘንጎላ ኩሽያ ዋጳናዉ፥ ሀ ሳትያዉ፥ ጋላሳዉ፥ አገናዉን ላይላዉ ጊግሰ ዋጴዳ፥ ኦይዱ ኪታንቻቱ ብለቱድኖ።

16 ኦላ ፓራ ቶግያ አሳ ፓይዱ ላኡ ጴቱ ሚሎን ግድያዎ ታን ሰሳድ።

17 ቃይካ ታን ሳጸን ፓራቱዋን ሄ ፓራቱዋ ቶጌዳ አሳ በእድ። አሳዉ ትራን ዋሳያ ብራታ ጎንዳልያ ማላይ ደኤ። ሄ ትራን ዋሳያ ብራታ ጎንዳልያ ማላይ ታማዳን ዞኦ፤ ሳማይያ፤ ቃይ ኤጽያ ዲንያ ማላ። ፓራቱዋ ሁጲ ጋሙዋ ሁጲያ ማላ። ኡንቱንቱ ዶናፕ ታማይ፥ ጨዋይን አድልያ ጨሻ ማላትያ ኤጽያ ዲንያ ታማይ ከሴዳ።

18 ፓራቱዋ ዶናፕ ከሴዳ ታማን፥ ጨዋንን ኤጽያ ዲንያን ሀ ሄዙ ቦሻቱዋን አሳ ዛርያፕ ሄዘንጎላ ኩሽ ሀይቄዳ።

19 እያዉ ጎፕ፥ ፓራቶ ዋልቃይ ዶናንን ዱፍያን ደኤ። ኡንቱንቱ ዱፊካ ሁጲያና ደእያ ሸሻ ማላቱ፤ ሄዋን ኡንቱንቱ አሳ ቆሂኖ።

20 ሀ ቦሻቱዋን ሀይቀናን አቴዳ አሳይ ባረ ኩሽያን ኦሳያዎ አግቤና። ቃይ ዋርቃፕ፥ ብራፕ፥ ናሃሲያ ጌተትያ ብራታፕ ሹቻፕፕን ዋሳፕ ኦሰቱዳ፥ ጴላናዉ ዋይ ሰሳናዉ ዋይ ሀመታናዉ ዳንዳየና ኤቃዉን ጸላህያዉ ጎይንያዋካ አግቤና።

21 አሳይ ኤሪድ ዋጴዳዋ፥ ዋይ ባረ ብቱዳዋ፥ ዋይ ባረ ዋሹሜዳዋ፥ ዋይ ባረ ዉኤዳዋ አጊደ፥ ባረ ናጋራፕ ሰሞቤና።

# 10

## ኪታንቻን ጉላ ማጸፋ

1 ቃይካ ታን ሀራ ዋልቃማ ኪታንቻይ ሳሉዋፕ ከሲደ፥ ዲገ ዋድያዎ በእድ። ሻርያ እ ማይ ኡቴዳ፤ ቃይ ዙሉ አ ሁጲያ ዩይ አድ ኡቴዳ። አ ዴሙካ አዋ ማላ፤ አ ገዲካ ታማ ቱሳ ማላ።

9:13 ከሳ 30:1-3    9:20 ማዘ. 115:4-7፤ 135:15-17፤ ዳኤላ 5:23

2 ሄ ኪታንቻይ ደያ ደእያ እት ጉላ ጸጸቶ ማጸፋ ባረ ኩሽያን ኦይቄዳ። ባረ ኡሽቻ ገድያ ኦባ ቦላ ኤሲደ። ባረ ሀድርሳ ገድያ ቢታ ቦላ ኤሴዳ።

3 ጉድያ ጋሙዋዳን፣ ዋልቃጥ ጉዴዳ። እ ጉዴዳዋጥ ጉይያን፣ ላፑ ጉጉንላቱ እናና ጉንላን ሃሳዬድኖ።

4 ኡንቱንቱ ጉሜዳ ዋደ ታን ጸፋናዉ ቆፓድ። ሽን ሳሉዋጥ፣ “ላፑ ጉጉንላቱ ሃሳዬዳዋ አሳዉ ቃቶፓን ጸፎፓ” ያግያ ኮሻይ ታዉ ሰሰቱዳ።

5 ሄዋጥ ጉዩ፣ አባ ቦላንን ቢታ ቦላን ኤቂደእሽን ታን በኤዳ ኪታንቻይ፣ ባረ ኡሽቻ ኩሽያ ሳሉዋ ፑደ ሞጩዳ።

6 ሳሉዋን ሳሉዋን ደእያ ኡባባ፣ ሳእነ ሳእን ደእያ ኡባባ፣ አባን አባን ደእያ ኡባባ፣ መጄዳ መጄ መጄናዉ ደእያ ጸሳ ሱንላን ጫቄዳ። ያቲደ፣ “ዋዲ ዉራናዉ ጋሞኤና።

7 ሽን ላፑንላ ኪታንቻይ ባረ ማላካታ ፑንያ ዋደ፣ ጸሳይ ናባቱዋ ግጄዳ ባረ ቆማቶ ቃላ ኦድ ዋሌዳዋዳንካ፣ እ ጹሬዳ ቆፋይ ፖለታና” ያጌዳ።

8 ሄዋጥ ጉይያን፣ ሳሉዋጥ ሃሳይሽን ታን ሰሴዳ ኮሻይ ላኤንሉዋ ዛሪደ ታና፣ “አባ ቦላንን ቢታ ቦላን ኤቄዳ ኪታንቻ ኩሽያን ደያ ደእያ ጸጸቶ ማጸፋ ባደ አካ” ያግያዋ ሰሳድ።

9 ታን ሄ ኪታንቻኮ ባደ፣ ጉላ ጸጸቶ ማጸፋ ታዉ እማና ማላ፣ አ ኦቻድ። እ ታና፣ “አካደ ማ፤ ማጸፋይ ነ ኡሉዋ ጫሞሳናዋ፤ ሽን ነ ደናን ኤሳዳን፣ እ ማልእናዋ” ያጌዳ።

10 ሄዋጥ ጉዩ፣ ታን ኪታንቻ ኩሽያጥ ሄ ጉላ ጸጸቶ ማጸፋ አካደ ማድ፤ ታ ደናን ማጸፋይ ኤሳዳን ማልኤዳ። ሽን ታን ሜዳዋጥ ጉይያን፣ ታ ኡሎ ግዲ ጫሜዳ።

11 ቃይካ ታና፣ “ያራ ኡባ፣ ዛርያ ኡባ፣ ዲማ ዲማ ቢታ ቃላነ ካታቱዋባ ኔን ትምቢትያ ቃንጸናን ሃሳያናዉ በሴ” ያጌዳ።

# 11

## ላኤ ማርካቱዋ

1 ሄዋጥ ጉዩ፣ ማቃ ማላትያ ልክያ ጸምአይ ታዉ እመቲዳ፤ ታና ጌዳዌ ሀዋ፤ “ባደ ጸሳ ጌሻ ጎልያን ያርሽያ ሳ ልካ። ሄዋን ጎይንያዋንታካ ፓይዳ።

10:5 ከሳ 20:11፤ ዛረ. 32:40፤ ዳኤላ 12:7፤ አሞጻ 3:7 10:8 ሀዘ. 2:8—3:3 11:1 ሀዘ. 40:3፤ ዛካ. 2:1-2

2 ሸን ጌሻ ጎለዉ ካረ ባጋ ከጋ ባሻ፤ ሄዋ ልኮፓ። አያዉ ጎፕ። ሄ ሳኦይ አይሁዳ ግደና አሳዉ እመቴዳ። አይሁዳ ግደና አሳይ ጌሻ ካታማ አይታማነ ላኡ አገናዉ የቆና።

3 ታን ጋብያ ማዬዳ ታ ላኡ ማርካቱዋ ኪታና፤ ኡንቴንቱ እት ሻእነ ላኡ ጾታነ ኡሱፑን ታሙ። ጋላሳን ጸሳ ኪታ ኦዳና” ያጌዳ።

4 ሄ ላኡ ማርካቱ ሀ ሳኦ ጎዳ ሰንላን ኤቂያ ጸምፕያ ዋልያ ላኡ ባላቱዋ።

5 ኦንነ ኡንቴንታ ቆሀናዉ ኮዮፕ። ኡንቴንቱ ደናፕ ታማይ ከሲደ ኡንቴንቱ ሞርከቱዋካ ቆይሴ። ቃይ ኦንነ ኡንቴንታ ቆሀናዉ ኮዮፕ። ሄዋዳንካ ሀይቃና።

6 ኡንቴንቱ ጸሳ ኪታ ኦድያ ዋድያን እራይ ቡከናዳን፤ ሳሉዋ ጎርዳናዉ ኡንቴንቶ ማታይ ደኤ። ኡንቴንቶ ሃላ ሱላ ከሰያ ማታይካ ደኤ፤ ቃይ ኡንቴንቱ ባረና ኮሽያ ዋደ። ሳኦ ዲማ ዲማ ቦሻን ሾጫናዉ ኡንቴንቶ ማታይ ደኤ።

7 ኡንቴንቱ ባረንቱ ማርካታላ ዉርሴዳዋፕ ጉይያን፤ ጨዋ ኦላፕ ፑደ ከሰያ ደኤይ ኡንቴንቱና ኦላታና። ሄ ደኤይ ኡንቴንታ ጸኒደ ዋቆና።

8 ኡንቴንቱ ጎዳይ ማሰቃልያ ቦላን ሞሰማርያን ቋሽቲደ ሱለቱዳ ካታማ ዋጋ ኦግያን ኡንቴንቱ አሃይ ግሳናዋ። ሄ ካታማይ ለምሱዋን ሶዶማ ዋይ ግብጾ ጌተቲደ ጸሰቴ።

9 ቃይ ያራ ኡባፕ። ቆሙዋ ኡባፕ። ዲማ ዲማ ቢታ ቃላፕነ ዛርያ ኡባፕ ዬዳ አሳይ ኡንቴንቱ አሃ ሄዙ ጋላሳነ ባጋ በአና። አሃይ ሞገተና ማላ። ሄ አሳይ ድጋና።

10 ሳኦን ደእያ አሳይ ሀ ትምቢትያ ኦድያ ላኡ አሳቱዋ ሀይቁዋን ናሽታና። አሳይ ኡንቴንቱ ሀይቁዋ እቱ እቱዋና እሞታ ላመቲደ ቦንቻናዋ፤ አያዉ ጎፕ። ሳኦን ደእያ አሳ ኡንቴንቱ ዳርሰ መቶሌድና።

11 ሄዙ ጋላሳነ ባጋፕ ጉይያን፤ ደኤዋ ሸምፑዋ ጸሳይ ኡንቴንቱን ሸምፕና። ኡንቴንቱ ደንድ ኤቂድና። ኡንቴንታ በኤዳ ኡባይ ኢታ ያሻ ያዬዳ።

12 ሄዋፕ ጉይያን፤ ሄ ትምቢትያ ኦድያ ላኡ አሳቱ ሳሉዋፕ። “ሄ ፑደ ከሰተ” ግያ ዋልቃማ ኮሻ ሰሴድና። ባረንቱ ሞርከቱ ባረንታ ጾልሸን፤ ኡንቴንቱ ሻርያን ገሊደ። ፑደ ሳሉዋ ቤድና።

---

11:2 ሉቃሳ 21:24    11:4 ዛካ. 4:3፣ 11-14    11:6 1 ካታ. 17:1፤ ከሳ 7:17-19፤ 1 ሳሜላ 4:8    11:7 ዳኤላ 7:7፣ 21፤ ሳ፻ 13:5-7፤ 17:8    11:8 ኢሳ. 1:9-10    11:11 ህዝ. 37:10    11:12 2 ካታ. 2:11

13 ሄ ሳትያን ቢታይ ሎይሳ ቃጽና ካታማፕ ታሙንላ ኩሺ ጳዬዳ። ቃይ ቢታ ቃላን ላፑ ሻኦ አሳይ ሀይቄዳ። አቴዳ አሳይ ሎይሳ ኮኮር ያዪደ፣ ሳሉዋ ጸሳ ግታተላ ሳቤዳ።

14 ላኤንሶ አዬር ግያዌ አዴዳ። ሸን አኬክተ፤ ሄዘንሶ አዬር ግያዌ ኤለካ ያናዋ።

**ላፑንላ ማላካታ**

15 ሄዋፕ ጉይያን፣ ላፑንላ ኪታንቻይካ ባረ ማላካታ ፑኔዳ። ሳሉዋን፣

“አላምያ ካዉተላይ

ሀእ ኑ ጎዳሳነ

ክርሰቶሳሳ፤

ቃይ መድናፕ መድና ጋካናዉ

እ ሞዳና”

ያግያ ዋልቃማ ኮሻይ ሰሰቴዳ።

16 ባረንቱ ኦይድያን ኡቴዳ ላታማነ ኦይዱ ጭማቱ ጸሳ ሰንላን ዲገ ጉፋኒደ፣ ጸሳዉ ጎይኒደ ሀዋዳን ያጌድኖ፤

17 “ሀእ ደእያዎ፣

ካሰፕካ ደእያዎ፣ ጎዳዉ፣

ኡባፕ ዋልቃማ ጸሳዉ፣

ነዉ ዋልቃማ ዋልቃይ ደእያ ድራዉነ፣

ኔን ሞዳናዉ ደሜዳ ድራዉ፣

ኑን ኔና ጋላቴቶ።

18 አይሁዳ ግደና አሳይ ሀንቀቴዳ፤

ነ ሀንቁካ ዬዳ።

ሀይቄዳዋንቱ ፕርደትያ ዋዲ ሀእ፤

ቃይ ኔን ነ ኦሳንቻቶ፣ ናባቶ፣

ጌሻቶ፣ ነ ሱንላዉ ያይያዋንቶ፣

ዶቃቶነ ላፋቶ ኡንቱንቱ ኡሱዋዳን፣

እምያ ዋዲካ ሀእ።

ሳኦ ዳይሰያዋንታካ ኔን ዳይሰያ ዋዲ ሀእ”

ያጌድኖ።

19 ሳሉዋን ደእያ ጸሳ ጌሻ ጎሊ ደየቴዳ፤ አ ጌሻ ጎልያን ጸሳ ቃላ ጫቁዋ ታቦታይ ቤቴዳ። ቃይ ዋልቃንላይ ዋልቃሜዳ፤ ጉንላይ ሰሰቴዳ፤ ጉጉንላይ ጉሜዳ፤ ቢታይ ቃጾዳ፤ ዋልቃማ ሻቻይካ ሻጩዳ።

---

11:15 ከሳ 15:18፤ ዳኤላ 2:44፤ 7:14፣ 27      11:18 ማዝ. 2:5፤ 110:5፤ 115:13

# 12

ታን ሞሽራቶ፣ ናኣነ ዳዊያ በኣድ

1 ሄዋፕ ጉይያን፣ ሳሉዋን ዋልቃማ ማላይ ቤቴዳ። አዋ ማዬዳ እት ሞሽራታ፣ አገና ቦላ ኤቄዳዉና፣ ታማነ ላኡ ጸልንትያ ካላቻ ባረ ሁጲያን ዋሌዳዉና ሄዋን ደአዉ።

2 ሄ ሞሽራታ ሻሃራ፤ እዞ የሉዋ ኦይላይ፣ ኡንኤልና ዋሳዱ።

3 ሀራ እት ዋልቃማ ማላይ ሳሉዋን ቤቴዳ። ታሙ ካጭያና ደአያ ላፑ ሁጲያን ካላቻ ዋሌዳ እት ዋልቃማ ዞኦ ዳዊ ደኤ።

4 ሄ ዳዊ ባረ ዱፍያን ሄዘንሶ ኩሽ ጸልንትያ ሳሉዋፕ ዳፊደ፣ ሳኣን ኦሌዳ። ሄ ዳዊ የለት ዋዶሳናካ ናኣ ማናዉ የላና ሀንያ ሞሽራት ሰንሓን ኤቄዳ።

5 ሞሽራታ አቱማ ናኣ፣ አይሁዳ ግደና አሳ ኡባ ብራታ ጸምኣን ሞዳናዋ የላዱ። ሽን ናኣይ ጸሳኮነ አ አራታኮ፣ ፑደ ኤለካ አከቴዳ።

6 ሞሽራታ እት ሻኣነ ላኡ ጴታነ ኡሱፑን ታሙ ጋላሳዉ ሞዚደነ ኡሺደ ዋላናዉ ጸሳይ ጊግሰ ዋሌዳ ሳኣ ባዙዋ ባቃታዱ።

7 ሄዋፕ ጉይያን፣ ሳሉዋን ኦላይ ደንዴዳ። ሞካኤል ባረ ኪታንቻቱዋና እትፕ ዳዊያ ኦለቴዳ፤ ዳዊካ ባረ ኪታንቻቱዋና ግዲይ፣ ዛር ኦለቴዳ።

8 ሽን ዳዊ ጸነትና ዳዊያሰነ አ ኪታንቻቶ ሳሉዋን ሳኣይ ቆይዳ።

9 ዋልቃማ ዳዊ፣ ጸላህያ ካፑዋ ዋይ ሴጸና ግያዌ፣ በን ሾሻይ፣ አላምያ ኡባ ባለልያዌ ኦለቴዳ፤ እ ባረ ኪታንቻቱዋና እትፕ ዱገ ሳኣዉ ኦለቴዳ።

10 ሄዋፕ ጉይያን፣ ታን ሳሉዋፕ ሀዋዳን ያግያ ኮሻ ሰሳድ፤

“ጸሳ አቶተላይ ሀእ ዬዳ።

ጸሳይ ባረዉ ካተ ግድያዋዳንካ፣

ባረ ዋልቃ በሴዳ፤

አ ክርሰቶሰ ባረ ማታ በሴዳ።

አያዉ ሳፕ፣

ቃማነ ጋላሰ ጸሳ ሰንሓን ኤቄዳ፣

ኦ እሻቱዋ ሞትያዊ፣

ሳሉዋፕ ዱገ ኦለቴዳ።

11 ኦ እሻቱ ዶርሳ ሱሓንነ፣

ባረንቱ ቱሙ ማርካተሓን

---

12:3 ዳኔላ 7:7    12:4 ዳኔላ 8:10    12:5 ኢሳ. 66:7፤ ማዘ. 2:9  
12:7 ዳኔላ 10:13፣ 21፤ 12:1፤ ዳኔላ 9    12:10 ኢዮባ 1:9-11፤ ዛካ. 3:1

ዳዊያ ኦለቲደ ጸኔድኖ።  
ቃይ ኡንቱንቱ ባረንቱ ሸምፑዋ አሐ እምያዎ።  
ቀረትበይክኖ።

12 ሄዋ ድራዉ።  
ሳሌነ ሳሉዋ ግደን ደእያዋንቱ።  
ናሸትተ።  
ሸን ሳአዉነ አባዉ አዬሮ!

አያዉ ጎፐ።  
ጸላህያ ካፑ።  
ባረዉ ጉላ ዎዲ አቴዳዋ ኤርያ ድራዉ።  
ዎልቃማ ሀንቁዋን።  
ዱገ ሀንተንቱኮ ዎዴዳ።

ያጌዳ።  
13 ቃይ ዳዊ ባረና ዱገ ሳአ ኦሌዳዋ በኤዳዋፕ ጉይያን፣ ሄ  
አቱማ ናኣ የሌዳ ምሽራቶ የደርሱዋ ደሜዳ።

14 ምሽራቶ ሸሻይ ቆሄና ማላ፣ ሄዙ ላይላነ ባጋ ማደነ ኡሻደ  
እዛ ናገትያሳ ባዙዋ ፓላደ ባና ማላ፣ ላኡ ዎልቃማ አርጋንላ ቀፊ  
እዝዉ እመቲዳ።

15 ሄዋፕ ጉይያን፣ ምሽራቶ ድኡ ድኢደ አፋና ማላ፣ ሸሻይ  
ሻፋ ሃላ ኬና ሃላ ባረ ደናፕ ምሽራት ጌዱዋን ጉሴዳ።

16 ሸን ቢታይ ምሽራቶ ማዴዳ፤ ቢታይ ባረ ደና ደዪደ፣ ዳዊያ  
ደናፕ ከሴዳ ሃላ ምት አጌዳ።

17 ዳዊ ምሽራትዉ ዳርሰ ሀንቀቲደ፣ እዝ ዘረላ ጸሳ አዛዙዋ  
ናግያ ኡባቱዋነ የሱሰ ቆንጭሴዳ ቱሙ አማነትያዋንታ ኦላናዉ።

18 ቢደ አባ ደናን ደእያ ሻፍያን ኤቁዳ።

# 13

ታን አባፕ ከሰያ ላኡ ደአቱዋ በአድ

1 ሄዋፕ ጉይያን፣ እት ደአይ አባፕ ከሰሸን፣ ታን በአድ። አዉ  
ታሙ ካጪነ ላፑ ሁጲ ደኤ፤ አ ታሙ ካጭያ ቦላን ታሙ ካላቻይ  
ደኤ። አ ሁጲያንካ ቦርያ ሱንሳይ ጸፈት ኡቴዳ።

2 ታን በኤዳ ደአይ ማህያ ማላቲ፤ አ ገዲ ባባንላ ጌተትያ  
ኢታ ዱአ ገድያ ማላቲ፤ አ ደናይ ጋሙዋ ደና ማላቲ። ዳዊ  
ባረ ዎልቃ፣ ባረ ካዉተላ ኦይድያነ ባረ ዎልቃማ ማታ ሄ ደአዉ  
እሜዳ።

---

12:14 ዳኔላ 7:25፤ 12:7      13:1 ዳኔላ 7:3፤ ሳፃ 17:3፤ 7-12      13:2  
ዳኔላ 7:4-6



3 ሄ ደአ ሁጳቱዋጥ እቱ ሀይቄዳዋ ማላትያዋ ታን በኣድ፤ ሸን ዋድያ ማይላይ ፓጾዳ። ሳኣ አሳይ ኡባይ ማላላቲድ፣ ሄ ዱኣ ጌዲዋ ካሌዳ።

4 ዳዋ ባረ ማታ ደአዉ እመዳ ድራዉ፣ አሳይ ኡባይ ዳዊያዉ ጎይኔዳ። ቃይ ሄ አሳይ፣ “ደኣ ማላይ ኦኔ? እናና ኦላታናዉ ኦን ዳንዳዪ?” ያጊድ፣ ደአዉ ጎይኔዳ።

5 ሄ ደአዉ ፓላ የዉዋን ቦርያ ሃሳይያ ደናይ እመቲዳ። ኦይታማን ላኡ አገናዉ ኦላና ማላ፣ አዉ ማታይ እመቲዳ።

6 ሄ ደአይ ጸሳ፣ አ ሱንላ፣ እ ደኢያሳን ሳሉዋን ደእያ ኡባቱዋ ቦርያ ደመዳ።

7 ሄ ደአይ ጸሳ አሳቱዋና ኦላቲድ፣ ኡንቱንታ ጸናና ማላ፣ አዉ ማታይ እመቲዳ። ቆሙዋ ኡባ፣ ያራ ኡባ፣ ዲማ ዲማ ቢታ ቃላ ኡባን ዛርያ ኡባ ሞድያ ማታይ አዉ እመቲዳ።

8 ሳአይ መጠታናጥ ካሰ ሹከቲዳ ደርሳ ደኡዋ ማጻፋን ሱንላይ ጸፈትቤና አሳይ፣ ሳኣን ደእያዊ ኡባይ፣ ሄ ደአዉ ጎይናና።

9 ሰሰያ ሀይላይ ደእያ ኡራይ ሰሶ።

10 አሞደታና አሳይ ደኣጥ።

ኦንን ኦሞደታናዋ።

ማሻን ሹከታና አሳይ ደኣጥ።

ኦንን ማሻን ሹከታናዋ።

ጌሻቱዋ ዳንዳያይነ።

አማኑ ሀዋን ኤረታናዋ።

**ታን ሳኣጥ ከሰያ ደአ በኣድ**

11 ሄዋጥ ጉይያን፣ ሀራ ደአይ ሳኣጥ ከሰያዋ ታን በኣድ። ደርሳ ካጭያ ማላትያ ላኡ ካጪ አዉ ደኤ፤ ሸን ሄ ደአይ ዳዊያዳን ሃሳይዳ።

12 ሄ ደአይ ኮይሮ ደአ ዋልቃማ ማታ ኡባ አ ሰንላን ኦሌዳ። ሳአይነ ሳኣን ደእያ አሳይ ኡባይ አ ዋድያ ማይላይ ፓጾዳ ኮይሮ ደአዉ ጎይናና ማላ፣ ሄ ደአይ ጎዳቲዳ።

13 ሄ ላኤንሶ ደአይ ዋልቃማ ማላታቱዋ ኦሌዳ፤ ሀራይ አቶ ታማ ሳሉዋጥ አሳ ኡባ ሰንላ ሳኣ ዋላና ጋካናዉ ማላታቱዋ ኦሌዳ።

14 ኮይሮ ደአ ሰንላን ኦላናዉ፣ አዉ እመቲዳ ማላታቱዋን ሳኣን ደእያ አሳ ኡባ እ ባለሌዳ። ማሻን ማይላቶጥን ፓጻ ደእያ ኮይሮ

---

13:5 ዳኤላ 7:8፣ 25፤ 11:36      13:7 ዳኤላ 7:21      13:8 ማዘ. 69:28  
13:10 ኤር. 15:2፤ 43:11

ደኣ ሦስቱ ምስልያ ገግሳናዳን፡ ሳኣ ኣሳ ኡባዉ ላኤንሶ ደኣይ ኦዴዳ።

15 ቃይ ኮይሮ ደኣ ምስሊ ሃሳያናዳንን ባረዉ ጎይነና ኡባ ዎቆናዳን፡ ላኤንሶ ደኣይ ባረ ሸምቸዎ ኮይሮ ደኣ ምስልያን ሸምቸዎ ገልሳናዉ ኣዛዘቲዳ።

16 ኣሳይ ኡባይ ዎጋይነ ቄራይ፡ ማንቁነ ዱሪ፡ ዎማኑነ ኣይሊ ባረ ኡሸቻ ኩሸያን ዎይ ባረ ዴሙዎን ማላ ዎላናዳን፡ ሄ ላኤንሶ ደኣይ ጎዳቲዳ።

17 ሄ ደኣ ሱንሳይ ዎይ ኣ ሱንሳ ፓይዱ ደኣያ ማላይ ባይና ኣሳይ ኦንነ ዛልኣናዉን ሻማናዉ ዳንዳየና።

18 ኣዴዳ ኤራተላይ ሀዎን ደኤ። ኤራይ ደኣያ ኦንነ ሄ ደኣ ፓይዱዎ ብለላ ኤር፤ ኣያዉ ጎፕ፡ ሄ ፓይዱ ኣት ኣሳ ሱንሳ። ኣ ፓይዱ ኡሱቸን ጴታን ኡሱቸን ታማነ ኡሱቸና።

# 14

## ታን ደርሳነ 144,000 ኣሳቲዎ በኣድ

1 ሄዎፕ ፑይያን፡ ታን በኣድ። በኣተ፡ ደርሳይ ጽዮነ ደርያ ቦላ ኤቄዳ። ኣ ሱንሳይነ ኣ ኣቡ ሱንሳይ ዴሙዎን ጸፈቲዳ፡ ኣት ጴታን ኦይታማነ ኦይዱ ሻኣ ኣሳቲ ኣናና ኣትፕ ደኣና።

2 ሳሉዎፕ ኩንሶ ሃላ ጉንሳነ ዳዳ ጉንሳ ማላትያ ዎልቃማ ኮሻ ታን ሰሳድ። ቃይ ታን ሰሴዳ ኮሻይ ዲላ ዲጽያዎንቲ ባረንቲ ዲላ ዲጽና ሰሰትያ ኮሻ ማላቲ።

3 ኣት ጴታን ኦይታማነ ኦይዱ ሻኣ ኣሳቲ ካዉተላ ኦይድያ ሰንሳን፡ ኦይዱ ፓጻ ደኣያ ሙጋቲዎ ሰንሳንን ጭማቲዎ ሰንሳን ኤቄድና። ሳኣፕ ዎዘቲዳ ኡንቲንቲፕ ኣትን፡ ሀራይ ኦንነ ታማራናዉ ዳንዳየና ኦራላ ማዘሙርያ የጴድና።

4 ሀዎንቲ ጌሻ ኣሳቲዎ ግድያ ድራዉ፡ ማጫዎንቲና ጋከቲደ ባረና ቲንሰበይክና። ደርሳይ \* ብያሳ ኡባ ኡንቲንቲ ካሊና። ኡንቲንቲ ጸሳዉን ደርሳዉ ባይራ ግዳናዉ፡ ሳኣ ኣሳ ግደፕ ዎዘቲዳዎንታ።

5 ኡንቲንቲ ኡባካ ዎርዶት ኤርክና፤ ኡንቲንቲን ባይዙ ባዎ።

## ታን ጸሳ ኪታንቻ በኣድ

14:1 ህዘ. 9:4፤ ሳፍ 7:3 \* 14:4 ደርሳ- የሱሳዉ ኣሙቲዳ ሱንሳ። 14:5 ሶፎ. 3:13

6 ሳኣን ደእያ አሳ ኡባዉ፡ ዛርያ ኡባዉ፡ ቆሙዋ ኡባዉ፡ ዲማ ዲማ ቢታ ቃላ ኡባዉነ ያራ ኡባዉ መድና ዋንጋላ ሞሽራቹዋ አዋያናዉ፡ ቦላ ሳሉዋን ፓልያ ሀራ ኪታንቻ ታን በኣድ።

7 ሄ ኪታንቻይ ባረ ቃላ ቶቁ ኦሊደ፡ “ጸሳዉ ያይተ፤ አ ቦንቶተ። አያዉ ሳፐ፡ ሳኣ አሳ እ ፕርድያ ሳቲ ጋኬዳ። ሳሉዋ፡ ሳኣ፡ አባነ ሃላ ፑልቱዋ መዴዳ ጸሳዉ ጎይንተ” ያጌዳ።

8 ሀራ ላኤንላ ኪታንቻይ፡ “ዋልቃማ ባብሎና ኩንዳዲ፤ እዛ ኩንዳዳ ጋሱነካ አሳ ዛርያ ኡባ ኢታ ኦሱዋ ኦሰሰያ ድራሳ” ያጌደ፡ ኮይሮ ኪታንቻ ካሌዳ።

9 ሄዘንላ ኪታንቻይ ባረ ኮሻ ቶቁ ኦሊደ፡ ሀዋዳን ያጌደ፡ ኮይሮ ላኡ ኪታንቻቱዋ ካሌዳ፤ “ዶአዉነ አ ሞሰለዉ ጎይንያ ኦንነ ቃይ አ ማላ ባረ ዴሙዋን ዋይ ባረ ኩሽያን ዋልያ ኦንነ ደኦፐ።

10 ጸሳይ ባረ ዋልቃማ ሀንቁዋ ቡርጩኩዋን ኩንጴዳ ሀንቁዋ ዋይንያ ኤሳ እ ኡሻና። ሄዋ ኦሌዳ ኡባይ ጌሻ ኪታንቻቱዋ ሰንላንነ ደርሳ ሰንላን፡ ታማንነ ኤጵያ ዲንያን ፓጸ ካኤታና።

11 ኤንቱንታ ፓጸ ካእያ ታማ ጩዋይ መድ መድናዉ ጩዋታና። ዶአዉነ ሄ ዶኣ ሞሰለዉ ጎይንያ ኦሰነ ቃይ ሄ ዶኣ ሱንላ ማላታና ደእያ ኦሰነ ቃማን ጋላሰ ሸሞፑ ባዋ” ያጌዳ።

12 ጸሳዉ አዘዘትያን የሱሳዉ አማነትያ ጌሻቱ ዳንዳይያ ዳንዳይያ ሀዋና።

13 ሄዋፐ ጉይያን ሳሉዋፐ፡ “ሀዋ ጸፋ፤ ሀዋፐ ሰንላዉ ጎዳን ሀይቁያዋንቱ አንጀቴዳዋንታ” ያግያ ኮሻ ታን ሰሳድ።

አያናይ፡ “ቱማ፤ ኤንቱንቱ ባረንቱ ዳቡራፐ ሸሞፓና፤ አያዉ ሳፐ፡ ኤንቱንቱ ሎኦ ኪታዉ፡ ጸሳይ ሎኡዋን ዛራና” ያጌ።

**ታን ቆይቻ ዋድያ በኣድ**

14 ቃይካ ታን በኣድ። በአተ፡ ቦላ ሻሪ ደኤ። ሻርያ ቦላን አሳ ናኣ ማላትያዌ ኡቱዳ፤ አ ሁጲያን ዋርቃ ካላቻይ፡ ቃይ አ ኩሽያን ቃራ ባጫይ ደኤ።

15 ሀራ ኪታንቻይ ጌሻ ጎልያፐ ከሲደ፡ ሻርያ ቦላን ኡቱዳዋ ባረ ቃላ ቶቁ ኦሊደ፡ “ቆይቻ ሳቲ ጋኬዳ ድራዉ፡ ነ ባጫ የዳደ ካላ ቆይጫ፤ አያዉ ሳፐ፡ ሳኣ ካላይ መሌዳ” ያጌዳ።

---

14:8 አሳ. 21:9፤ ኤር. 51:8፤ ሳፃ 18:2      14:10 አሳ. 51:17፤ ዶመላ 19:24፤ ህዘ. 38:22      14:11 አሳ. 34:10      14:14 ዳኤላ 7:13      14:15 ኢዪ. 3:13

16 ሻርያ ቦላን ኡቴዳዌ፣ ባረ ባጫ ሳኦ የዲደ፣ ሳኦ ካላ ጫኬዳ።

17 ቃይካ ሳሉዋን ደእያ ጌሻ ጎልያፕ ሀራ ኪታንቻይ ከሴዳ፤ አዉካ ኩሳ ባጫይ ደኤ።

18 ታማዉ ካፖ ግዴዳ ሀራ ኪታንቻይ ያርሽያ ሳፕ ከሲደ፣ ኩሳ ባጫይ ደእያ ኪታንቻዉ ባረ ቃላ ቶቁ ኦሊደ፣ “ዎይንያ አይፊ ቴራዳ ድራዉ፣ ነ ኩሳ ባጫ የዲደ፣ ሳኦን ደእያ ዎይንያ ቱራፕ ሆንዶዳ አይፍያ ቃንጸ!” ያጌዳ።

19 ሄ ኪታንቻይ ባረ ባጫ ሳኦ የዲደ፣ ሳኦን ደእያ ዎይንያፕ ሆንዶዳ አይፍያ ቃንጸዳ፤ ጸሳ ዎልቃማ ሀንቁዎ ሄ ዎይንያ ጉምእያ ኦላን የጌዳ።

20 ካታማፕ ጋጸን ደእያ ዎይንያ አይፍያ ጉምእያ ኦላን ዎይንያ አይፊ ጉምኤቴ። ሱሳይ ከሲደ፣ ሄ ዎይንያ ጉምእያ ኦላፕ ሄዙ ጾቱ ኪሎ ሚትርያ ኬና ሃኪደ፣ ፓራዉ ፑሉዎ ጋክያዎ ኬና ቶቁ ጊደ ኤሌዳ።

# 15

## ታን ቡርጩኩዎ አባ ቤኣድ

1 ታን ሳሉዋን ሀራ ዎልቃማን ማላልሰያ ማላ ቦኣድ። ጸሳ ሀንቁ ኡንቱንቱ ቦላን ፖለትያ ድራዉ፣ ዉርሰላ ላፑ ቦሻና ደእያ ላፑ ኪታንቻቱ ደኢድ።

2 ቃይካ ታን ቡርጩኩዎ አባ ማላትያዎ ታማና ዎላከቴዳዎ ቦኣድ። ቃይ ደኣ፣ አ ምሰልያነ አ ሱንላ ፓይዲዎ ጸኔዳዎንታ ቦኣድ። ጸሳይ ኡንቱንቶ እሜዳ ዲላቱዎ ኦይቂደ፣ ቡርጩኩዎ ማላትያ አባ ማታን ኡንቱንቱ ኤቄድኖ።

3 ኡንቱንቱ፣ ጸሳ ኦሳንቻ ሙሴ ማዘሙርያነ ዶርሳ ማዘሙርያ ሀዎዳን የጾድኖ።

“ጎዳዉ፣ ኡባፕ ዎልቃማ ጸሳዉ፣

ነ ኪታይ ግታነ ማላልሰያዎ።

አሳ ዛርያ ኡባ ካተዉ፣

ነ ኦጊ ጽሉዋነ ቱሙዎ።

4 ጎዳዉ፣ ነዉ ያየናዌነ

ነ ሱንላ ቦንቹናዌ ኦኔ?

አያዉ ጎፕ፣ ጌሻይ ነ ጸላላ።

አሳ ዛርያ ኡባይ ዪደ፣

ነ ሰንላን ጎይናና፤

እያው ጎጥ፣ ነ ጽሎ ኪታይ  
ኡባው ቆንጨዳ”  
ያጊደ የጸድ።

**ላፑ ቦሻና ደእያ ላፑ ኪታንቻቱዋ**

5 ሄዋጥ ጉይያን፣ ታን ሳሉዋን ደእያ ጌሻ ጎሊ ደየቶዋ ሄዌካ ማርካተላ ዲንካንያ በእድ።

6 ላፑ ቦሻና ደእያ ላፑ ኪታንቻቱ ጌሻ ጎልያጥ ከሴድኖ። ኡንቱንቱ ጳሊደ ቦጽያ ላይኑዋ ማዩዋ ማዬድኖ፤ ባረንቱ ትራዎርቃ ዳንጨዋን ዩሽ አሊደ ቃቹድኖ።

7 ደኡዋን ደእያ ኦይዲ መጋታቱዋጥ እቱ፣ መድ መድናዉ ጋካናዉ ደእያ ጸሳ ሀንቁ ኩሜዳ ላፑ ዎርቃ ከረቱዋ ላፑ ኪታንቻቶ እሜዳ።

8 ጸሳ ቦንቹዋጥን አ ዎልቃጥ ዬዳ ጨዋይ ጌሻ ጎልያ ኩሜዳ። ላፑ ኪታንቻቱ አሄዳ ላፑ ቦሻቱ ፖለታና ጋካናዉ፣ ጌሻ ጎልያ ኦንነ ገላናዉ ዳንዳይቤና።

# 16

**ጸሳ ሀንቁ ኩሜዳ ከረቱዋ**

1 ሄዋጥ ጉይያን፣ ላፑ ኪታንቻቶ፣ “ቢደ ጸሳ ሀንቁዋ ላፑ ከርያጥ ሳኣን ጉሰተ” ያጊደ፣ ጌሻ ጎልያጥ ሃሳይያ ዎልቃማ ኮሻ ታን ሰሳድ።

2 ኮይሮ ኪታንቻይ ቢደ፣ ባረ ከርያን ደእያዎ ሳኣን ጉሰና፣ ደአ ማላይ ደእያዋንቱ ቦላነ ሄ ዶኣ ሞሰለዉ ጎይንያዋንቱ ቦላ ሎይሳ ሳክያ ማይላ ከሴዳ።

3 ላኤንሉ ኪታንቻይ ባረ ከርያን ደእያዎ አባን ጉሰና አባ ሃላይ ሀይቄዳ አሳ ሱላ ማላቴዳ። ቃይ አባን ደእያ መጋታ ኡባይካ ሀይቄ አጌዳ።

4 ሄዘንሉ ኪታንቻይ ባረ ከርያን ደእያዎ ሻፋቱዋንን ፑልታቱዋን ጉሰና ኡንቱንቱ ሱላ ግዴድኖ።

5 ሃላዉ አዎትያ ኪታንቻይ ሀዋዳን ያግያዋ፣ ታን ሰሳድ፤ “ካሰካ ሀእካ ደእያ ጎዳዉ፣

ጌሻዉ፣ ሀ ፕርዳ ፕርዴዳ ድራዉ፣  
ኔን ጽሉዋ።

---

15:4 ኤር. 10:7፤ ማዝ. 86:9    15:5 ከሳ 38:21    15:8 ከሳ 40:34፤  
1 ካታ. 8:10-11፤ 2 ኡዲዎ 5:13-14፤ ኢሳ. 6:4    16:2 ከሳ 9:10    16:4  
ከሳ 7:17-21፤ ማዝ. 78:44

6 ኡንቱንቱ ጌሻቱዋ ሱላነ፥  
 ናባቱዋ ሱላ ጉሴዳ ድራዉ፥  
 ኔን ኡንቱንታ ኡሻናዉ፥  
 ሱላ ኡንቱንቶ እማዳ።

ኡንቱንቱ ባረንቶ፥  
 በሰያዋ አኬድኖ”  
 ያጌዳ።

7 ያርሹዋ ያርሽያ ሳጥ፥  
 “ሳዳዉ፥ ኡባጥ ዋልቃማ ጸሳዉ፥  
 ነ ፕርዳይ ቱሙዋነ ጽሉዋ!”  
 ያግያ ኮሻ ታን ሰሳድ።

8 ኦይደንጽ ኪታንቻይ ባረ ከርያን ደእያዋ አዋይፍያ ቦላን ጉሰና ባረ ታማ ሴላን አሳ ጉዳናዉ፥ አዋይፈዉ ማታይ እመቲዳ።

9 አሳይ ዋልቃማ ሴላን ጉደቲደ ሀ ቦሻቱዋ ቦላን ማታይ ደእያ ጸሳ ሱንጻ ቦራዳ። ሽን ባረ ናጋራጥ ሰምቤናነ ጸሳ ግታተሳካ ቦንቶቤና።

10 እቼሽንጽ ኪታንቻይ ባረ ከርያን ደእያዋ ዶኦ ካዉተሳ ኦይድያ ቦላ ጉሰና፥ ሄ ዶኦ ካዉተሳይ ቋሜዳ። አሳይ ባረ ሴላ ድራዉ፥ ባረ እንጻርሳ ሳኤዳ።

11 ቃይ አሳይ ባረ ሴላ ድራዉነ ባረ ማይሳ ድራዉ ሳሉዋ ጸሳ ሸቄዳ። ሽን ባረ ኦፊዳ ናጋራጥ ሰምቤና።

12 ኡሱፑንጻ ኪታንቻይ ባረ ከርያን ደእያዋ ዋጋ ኤፍራዲሳ ጌተትያ ሻፋን ጉሰና አዋይ ዶልያ ባጋጥ ያና ካታቶ ኦጊ ጊጋናዳን፥ ሃሳይ መሌዳ።

13 ሄዋጥ ጉይያን፥ ታን ሹቋያ ማላትያ ሄዙ ቱና አያናቱ ዳዋያ ዶናጥ፥ ዶኦ ዶናጥነ ዋርዱዋ ትምቢትያ ኦይያዋ ዶናጥ ከሰሽን በኦድ።

14 ኡንቱንቱ ማላቱዋ ኦልያ ጸላሀቱዋ አያናቱዋ። ሄ ሄዙ ኢታ አያናቱ ኡባጥ ዋልቃማ ጸሳ ዋልቃማ ጋላሳን፥ ሳኦ ካታቱዋ ኡባ ኦላዉ ሺሻናዉ ባና።

15 “በኦ፥ ታን ካይሱዋዳን ያና። አሳ ሰንጻን ካሎ ሀመቲደ ዬላተና ማላ፥ ገምእሸናን ባረ ማዩዋ ማዩደ ናግያ ኡራይ አንጀቲዳዋ!” ያጌዳ።

16 ሄ ኢታ ኢያናቱ ካተቱዋ እብራይስጢ ቃላን አርማገደና \*  
ጌተትያ ሳኣ ሺሺድኖ።

17 ላፑንሳ ኪታንቻይ ባረ ከርያን ደእያዋ ጫርኩዋን ጉሰና።  
ጌሻ ጎልያን ደእያ አራታፕ፡ “ፖለቲዳ” ያግያ ዋልቃማ ኮሻይ  
ዬዳ።

18 ሄዋፕ ጉይያን፣ ዋልቃንሳይ ዋልቃሜዳ፤ ጉንሳይ ሰስቲዳ፤  
ጉጉንሳይካ ጉሜዳ። ቃይ ቢታይ ፓላ ቃላ ቃጾዳ። አሳይ ሳኣን  
መፍቶደገካ ቢታይ ሄዋ ማላ ቃላ ቃጽ ኤረና፤ ሄዌ ኡባፕ አጫዳ  
ቃላ።

19 ዋልቃማ ካታማይ ሄዙ ከሲደ ዛኤዳ። ቢታ ኡባን ደእያ  
ካታማቱ ጳዬድኖ። ጸሳይ ዋልቃማ ባብሎኖ ቆፒደ፣ ባረ ኢታ  
ሀንቁዋ ዋይንያ ኤሳይ ኩሜዳ ቡርጩኩዋፕ ዋይንያ ኤሳ  
ባብሎኖ ኡሺዳ።

20 አባን ደደቲዳ ቢታይ ኡባይ ጳዬዳ፤ ደሪካ ቤትቤና።

21 አሳ ቦላ ኦይታሙ ኪሎ ኬና ዴጽያ ዋልቃማ ሻቻይ ሳሉዋፕ  
ዋጫዳ። አሳይ ሄ ሻቻ ቦሻ ድራዉ፣ ጸሳ ቦሬዳ፤ አያዉ ጎፕ፣ ቦሻይ  
ዳሮ ዋልቃማ።

# 17

## ባብሎን ቦላ ያና ሙራ

1 ሄዋፕ ጉይያን፣ ላፑ ከረቱ ደእያ ላፑ ኪታንቻቱዋፕ እቱ  
ታኮ ዩደ፣ ታና ሀዋዳን ያጌዳ፤ “ሃያ፤ ዳሮ ሻፋቱዋ ጋጸን ደእያ  
ዋሹዎያ፣ ዋልቃማ ካታማታ፣ ዋና ሙረታንንቶ፣ ታን ኔና ቦሳና።

2 ሳኣን ደእያ ካታቱ እዝና ዋሹሜድኖ፤ ሳኣን ደእያ አሳይካ  
እዝ ዋይንያ ኤሳ ኡሽ ማላቲደ እዝና ዋሹሜዳ” ያጌዳ።

3 ሄ ኪታንቻይ ታና ኢያናን ባዙዋ አፌዳ። ሄዋን ታን እት  
ዎሽራቶ ቦርያ ሱንሳይ ቦላ ኡባን ጸፈት ኡቲዳ ዞኦ ደኣ  
ቶጌዳዉኖ ቦኣድ፤ ሄ ደኣዉ ላፑ ሁጲያን ታሙ ካጪ ደኤ።

4 ሄ ዎሽራታ ቲራ ኦቻ ማላትያ ማዩዋን ዞኦ ማዩዋ ማያዳ፤  
እዛ ቃይ ዋርቃን፣ ቦንሻ ሹቻንን እንቁዋ ጌተትያ አልኦ ሹቻን

\* 16:16 አርማገደና፡- ሀ ቃላዉ ኮይሮት ደእያ እብራይስጢያ መፍታይ፡  
“ሀር-ማግደ” ያግያዋ ግዲደ፡ “ሀር-ማግደ” ግያዋ ደእያ ብለላይ፡ “ሚግደ-ዘዝያ”  
ያግያዋ፡ ሀዋ ጉሳይ ቦን ዋድያን አሳይ ጮራ ኦላ ኦላቲዳ ሳኣ ጉሳ። 16:16 2  
ካታ. 23:29፤ ዛካ. 12:11 16:19 ኢሳ. 51:17 16:21 ከሳ 9:23፤ ሳፃ  
11:19 17:2 ኢሳ. 23:17፤ ኤር. 51:7

አሌቃዲ። እዛ ዎሹምያ ቱናባይነ ሸነይያባይ ኩሜዳ ዎርቃ ቡርጨኩዎ ባረ ኩሸያን ኑይቃዲ።

5 እዝ ዴሙዋን ጹራ የወዋ ብለላይ ደእያ ሱንላይ፡

“ዎልቃማ ባብሎኖ፤  
ሳእን ደእያ  
ዎሹምያዎንቶነ  
ሳእን ደእያ  
ሸነይያባዉ አቶ”

ያግያዌ ጸፈት ኡቴዳ።

6 ቃይ ሄ ምሸራታ ጌሻቱዎ ሱላነ የሱሳዉ ማርካትሸን ዎዴዳዎንቱ ሱላ ኡሻደ ማሶቴዳዉኖ ታን በአደ ማላለታድ።

7 ኪታንቻይ ታና፡ “ኔን አያዉ ሀዋዳን ማላለታዲ? ታን ነዉ ምሸራት ጹራ የወዋነ እዛ ቶኬዳ ላቸ ሁጲያን ታሙ ካጪ ደእያ ዲእ ጹራ የወዋ ኑዳና።

8 ኔን በኤዳ ዶአይ ካሰ ደኤ፤ ሸን ሀእ ባዋ። ሄ ዶአይ ጨዋ ኦላፕ ኤለ ከሲደ፡ ባሻዉ ባናዋ። አላሚ መቅደፕ ዶሚደ፡ ደኡዎ ማጻፋን ኡንቱንቱ ሱንላይ ጸፈትቤና ሳእን ደእያ አሳይ ዶአ በአደ ማላለታና። አያዉ ሳፕ፡ እ ካሰ ደኤ፤ ሀእ ባዋ፤ ሸን ሰንላፕ ያናዋ።

9 “ሀዌ አዴዳ ኤራተላነ እኬካ ኮዬ። ላቸ ሁጲ ምሸራታ ኡትያ ላቸ ደረቱዋ፤ ሄዎንቱ ቃይ ላቸ ካታቱዋ።

10 ኡንቱንቱፕ እቼሹ ካታቱ ኩንዴድኖ። እቱ ሀእ ጋካናሰካ ሞዴ፤ የኮ ካቲ ይቤና። እ ዪደ፡ ጉላ ዎድያ ታካናዉ በሴ።

11 ካሰ ደኤዳ ዶአይ፡ ሀእ ባይናዌ፡ እ ባረ ሁጲዉ ሆሰቸንላ ዲኦ። እ ላቸ ዶአቱዋፕ እቱዋ፤ እ ጳያናዉ ቤ።

12 “ኔን በኤዳ ታሙ ካጩቱ ሞዳናዉ ደምቤና ታሙ ካተቱዋ። ሸን ኡንቱንቱ ዶአና እትፕ እት ሳተዉ ካተቱዋዳን ሞዳናዉ ኡንቱንቶ ማታይ እመታና።

13 ኡንቱንቶ ኡባዉ እት ቆፋይ ደኤ፤ ኡንቱንቱ ባረንቱ ዎልቃነ ባረንቱ ማታ ዶአዉ እማና።

14 ኡንቱንቱ ዶርሳና ኦለታና፤ ሸን ዶርሳይነ ዶርሳና ደእያዎንቱ፡ እ ጸጌዳዎንቱነ ዶሬዳዎንቱ፡ እ ካልያ አማነቱዳዎንቱ፡ ሄ

17:4 ኤር. 51:7 17:8 ዳኤላ 7:7፤ ሳፍ 11:7፤ ማዝ. 69:28 17:12 ዳኤላ 7:24



ካተቱዋ ጸናና፤ አያው ጎጥ፡ እ ጎዳቱዋ ጎዳነ ካተቱዋ ካትያ” ያጌዳ።

15 ኪታንቻይ ቃይካ ታና ሀዋዳን ያጌዳ፤ “ጫራታ ኡቴዳ ሄ ኔን በኤዳ ሃሳይ ያራቱዋ፡ ጮራ አሳ፡ አሳ ዛራቱዋን ዲማ ዲማ ቢታ ቃላ።

16 ቃይ ኔን በኤዳ ታሙ ካጨነ ዶአይ ዎሹመውኖ እጸናዋንታ። ኡንቱንቱ እዘው ደእያ ኡባባ እክ ድጋና። ቃይ እዘ ካሎ አሻናነ እዘ አሹዋ ም ድጋና፤ ያቲደ ኡንቱንቱ እዘ ታማን ጉዳና።

17 አያው ጎጥ፡ ጸሳ ቃላይ ቱማታና ጋካናው፡ ኡንቱንቱ ቆፋይ እቱዋ ግዳናዳን፡ ኡንቱንቱ ባረንቱ ሞድያ ዎልቃ ዶአው እማናዳንን ጸሳይ ቆፔዳዋ ኡንቱንቱ ኦላናዳን፡ ኡንቱንቱ ዎዛናን ጸሳይ አሙዋ ዎሌዳ።

18 “ሄ ኔን በኤዳ ምሽራታ ሳኦ ካተቱዋ ሞድያ ዎልቃማ ካታማቶ” ያጌዳ።

# 18

## ባብሎን ኩንደሳ

1 ሄዋጥ ጉይያን፡ ዎልቃማ ማታይ ደእያ ሀራ ኪታንቻይ ሳሉዋጥ ዎድሸን፡ ታን በኦድ። ሄ ኪታንቻ ቦንቹ ሳኦ ፖእሴዳ።

2 ሄ ኪታንቻይ ባረ ኮሻ ዶቁ ኦሊደ፡

“እዛ ኩንደዱ!

ዎልቃማ ባብሎና ኩንደዱ!

ባብሎና ጸላሀቱ አቅያሳ ግዳዱ፤

ኢታ አያናቱ ኡባቱ፤

እጸትያ ኢታ ካፋቱ ኡባቱ ኢን ደኢኖ።

3 አያው ጎጥ፡ አሳ ዛርያ ኡባ፡

ባረ ማላይያ ዎይንያ ኤሳ ኡሸና፡

እዘና ዎሹሜድኖ።

ቃይካ ሳኦ ካታቱ፡

እዘና ዎሹሜድኖ።

እዘ እሻሎ ዎልቃ ጋሱዋን፡

ሳኦን ደእያ ዛልአንቻቱ ዲረቴድኖ”

ያጌዳ።

4 ሄዋጥ ጉይያን፡

ታን ሳሉዋጥ፡

18:2 ኢሳ. 13:21፤ 21:9፤ ኤር. 50:39፤ 51:8፤ ሳፃ 14:8 18:3 ኢሳ. 23:17፤ ኤር. 51:7

ሀዋዳን ያግያ ሀራ ኮሻ ሰሳድ፤  
“ታ አሳወ፥ ኢፐ ከሰተ!

እዝ ናጋራ እዝና ኮጾፕተ!  
እዝ ሙራ ግሸቶፕተ።

5 አያወ ሳፕ፥ እዝ ናጋራይ፥  
ሳሉዋ ጋካናወ ዶረት ኡቴዳ።  
ጸሳይ እዝ ኢታ ባይዙዋ፥ ሀሳዬዳ።

6 እዛ እሜዳዋ ኬና ዛሪደ፥  
እዝወ እምተ። እዛ ኦፊዳዎ፥  
ላኡ ኩሸያ እዝወ ቃንጽተ።  
እዛ ሀንተንቶ ጊግሴዳ ኡሻፕ፥  
ላኡ ኩሸያ ኡሻ፥  
እዝ ቡርጨኩዋ ኩንሰተ።

7 እዛ ቦንቼቴዳዋን፥  
እሻሌዳዋ ኬና፥  
እዝ ቱጋይተነ ካዮይተ።  
እዛ ባረ ዋዛና።

‘ታን ካታቲዳን ኡታይ፤  
ታን አሰናይ ባይና ማጫወኖ ግድከ፤  
ቃይ ኡባካ ካዮትከ’ ያጋወ።

8 ሄዋ ድራወ፥ እዝ ቦሻ ኡባይ፥  
ሀርጊ፥ ካዩነ ኮሻይ፥  
እዝ እት ጋላሰ ኦይቃና።  
ቃይ እዛ ታማን ጉደታና፤  
አያወ ሳፕ፥  
እዝ ቦላ ፕርድያ ጎዳ ጸሳይ፥ ዋልቃማ”

ያጌዳ።

9 ሳኦ ካታቱ፥ እዝና ዋሹሚደ እሻሌዳዋንቱ ሄ ካታማታ  
ጉደትና፥ ከሰያ ጨዋ በኤዳ ዋደ፥ ካታማትወ ኡንቱንቱ ዋሳናነ  
ዬካና።

10 ኡንቱንቱ ሄ ካታማት ኡጋወ ያዬዳ ድራወ፥ ሃክ ኤቂደ፥  
“ሀ ዋልቃማ ካታማቱ! ዋልቃማ ካታማቱ! ባብሎኔ፥ ነወ  
አዬር! ኔን አይ ማላ ቱጋታኒሻ። ኔን እት ሳትያ ግድን ነ ፕርዳ  
አካዳ” ያጋና።

---

18:5 ዶሞላ 18:20-21፤ ኤር. 51:9    18:6 ማዝ. 137:8፤ ኤር. 50:29  
18:7 ኢሳ. 47:7-9    18:9 ሀዝ. 26:16-17

11 ኡንቲንቲ ማርካብያ ጫና ሀዋጥ ሰንፋናው ሻምያባይ ባይና ድራው፡ ሳኣን ደእያ ዛልአንቻቲ ሄ ካታማትዉ ዋሳናን ካዮታና።

12 ኡንቲንቲ ዋርቃ፡ ብራ፡ ቦንቾ ሹቻ፡ እንቁዋ ጌተትያ አልኦ ሹቻ፡ ቲራ ኦቻ ማላትያ ማዩዋ፡ ሱፍያ ማላ ማዩዋ፡ ሀርያ ጌተትያ ማዩዋ፡ ዞኦ ማዩዋ፡ ኡባ ቆሞ ሳዊያ ሞፋ፡ ኡባ ቆሙዋን ኦሌዳ ዳንጋርሳ አቻ፡ አልኦ ሞፋጥ መፍቲዳባ፡ ናሃሲያ፡ ብራታ፡ አብነበረድያ ጌተትያ ሹቻ፡

13 ቃራፋ፡ ቅማምያ፡ እጻና፡ ሸቲዋ፡ ሳዊያ እጻና ጴልያ፡ ዋይንያ ኤሳ፡ ዋጋራ ዛይትያ፡ ሊቄዳ ጴልያ፡ ዛርጋ፡ ሚዛ፡ ደርሳ፡ ፓራነ ፓራይ ጎቶያ ጋርያ፡ ኡንቲንቲ አይለቲዋን ሀራይ አቶ አሳ ሸምፑን ሻምያባይካ ባዋ።

14 ዛልአንቻቲ ሞሽራትዉ፡

“ኔን አሞቴዳ፡  
ሎኦባይ ኡባይ ኔጥ ሀል ድጌዳ።  
ነ ደኡነ፡  
አሌቀትያባይ ኡባይ ጳይድጌዳ።  
ኔን ላኤንሶ ኡንቲንታ ኡባካ ደማካ”

ያጌድኖ።

15 ሄ ካታማትን ዛልኢደ ዱረቴዳ ዛልአንቻቲ እዝ ኡጋዉ ያዩደ፡ አጥ ሃኪደ ኤቃና። ኡንቲንቲ ዬካናን ካዮታና።

16 ቃይ፡

“ሱፍያ ጌተትያ፡

ክርያን ደደቴዳ ማዩዋ፡  
ቲራ ኦቻ ማላትያ፡  
ማዩዋን ዞኦ ማዩዋ ማያደ፡  
ዋርቃ አሌቁዋን፡  
ቦንቾ ሹቻን፡  
እንቁዋ ጌተትያ አልኦ ሹቻን አሌቄዳ፡  
ሄ ዋልቃማ ካታማትዉ አዬር!

17 ሀዋ ኬና ዋልቃማ ማጺ ኡባይ፡

እት ሳትያ ግደን፡ ድፕ ግ ጳይ አጌዳ”

ያጌድኖ።

ማርካብያ ላግያ ኡባቲ፡ ማርካብያን ብያ ኡባቲ፡ ማርካብያን ኦልያ ኡባቲ፡ አባን ኦል ጎኤትያ ኡባቲ ሃክ ኤቄድኖ።

18:11 ህዝ. 27:31፣ 36    18:12 ህዝ. 27:12፣ 13፣ 22    18:15 ህዝ. 27:31፣ 36    18:17 ኢሳ. 23:14፤ ህዝ. 27:26-30

18 ሄ ካታማታ ጉደትና ከሰያ ጨዋ በኤዳ ዎደ ባረንቱ ኮሻ ጵቁ ኦሊደ፡ “ሀ ዎልቃማ ካታማቶ ማላትያ ካታማይ ኡባካ ባዎ” ያጌድኖ።

19 ኡንቱንቱ ባረንቱ ሁጲያን ባና ቆሊደ፡ ዋሴድኖን ካዮቴድኖ፤ “አባን ማርካባቱ ደእያ ኡባ፡ ባረ ማቁዎን ዲረዬዳ፡ ዎልቃማ ካታማትዉ እዬር! ቃይ እዘዉ ደእያባይ ኡባይ እት ሳትያ ግደን ጳይ አጌዳ።

20 ሄ ካታማታ ጳዬዳ ድራዉ፡ ሳሎ፡ ናሽታ! ጌሻቶ፡ የሱሰ ኪቲዳዎንቶ፡ ናባቶ፡ ናሽተተ! እያዉ ጎፕ፡ እዛ ሀንተንታ ኦፊዳዎ ድራዉ፡ ጸሳይ እዘ ፕርዴዳ” ያጌዳ።

21 ሄዎፕ ጉይያን፡ ዎልቃማ ኪታንቻይ፡ ዎጸ ማላትያ ዎልቃማ ሹቻ፡ ደንሕ አባን ኦሊደ ሀዎዳን ያጌዳ፤ “ዎልቃማ ካታማታ፡ ባብሎና፡ ሱግና ሀዎዳን ኩንዳና፤ እዛ ሀቼፕ ሰንፋዉ፡ ኡባካ ቤቱኩ።

22 ዲላ ዲጽያዎንቱ፡ ማዘሙርያ የጽያዎንቱ፡ ሱሱልያነ ማላካታ ፑንያዎንቱ፡ ኮሻይ ሀዎፕ ሀን ባጋን፡ ነ ግደን ኡባካ ሰሰተና። ኩሽያ ሂላ ኤርያ ኦንነ፡ ላኤንሶ ኡባካ ደኤና።

ዎጸ ኮሻይካ ሀዎፕ ሰንፋዉ ነ ግደን ሰሰተና።

23 ጸዎፕያ ፖኡካ ላኤንሶዎ ነ ግደን ፖኤና። አክያዎ ኮሻይነ ገለዉን ኮሻይ፡

---

18:18 ሀዘ. 27:32 18:19 ሀዘ. 27:30-34 18:20 ዛረ. 32:43፤ ኤር. 51:48 18:21 ኤር. 51:63-64፤ ሀዘ. 26:21 18:22 ሀዘ. 26:13፤ ኢሳ. 24:8 18:22 ኤር. 7:34፤ 25:10

ሰንላዉ ነ ግደን ሰሰተና።  
 ነ ዛልእንቻቱ ሳኣ ኡባን፤  
 ኤረቴዳ ዎልቃማቱዎ።  
 ነ ብትያዎን አሳ ዛርያ ኡባይ ጭመቲዳ።

24 ናባቱዎ ሱላይ፤  
 ጌሻቱዎ ሱላይነ፤  
 ሳኣን ሀይቄዳ ኡባቱዎ ሱላይ፤  
 እዝን ቤቴዳ ድራዉ፤  
 ባብሎና፤ መራታዳ።”  
 ያጌዳ።

# 19

1 ሄዋፕ ጉይያን፤ ሳሉዋን ጮራ አሳ ኮሻዳን ኮሹምያ ዎልቃማ ኮሻይ ሀዋዳን ያግያዎ ታን ሰሳድ፤  
 “ጸሳ ጋላታይ ጋኮ።

እቶተላይ፤ ቦንቹን ዎልቃይ፤  
 ኑ ጸሳሳ።

2 አ ፕርዳይ ቱሙዋን ጽሉዎ።  
 ጫራታደ ሳኣ ቱንሴዳ፤  
 ዎልቃማ ጫራቶ ጸሳይ ፕርዴዳ፤  
 ጸሳ አሳንቻቱዎ እዛ ዎጄዳ ድራዉ፤  
 ጸሳይ እዘ መራዳ።”

ያጌዳ።

3 አሳይ ላኤንሉዋ ባረ ኮሻ ጶቄ ኦሊደ፤  
 “ጸሳ ጋላታይ ጋኮ።

ሄ ካታማታ መጵ መጵናዉ ጨዋታና”  
 ያጌድኖ።

4 ላታማን ኦይዱ ጭማቱን ሸምፑዋና ደእያ ኦይዱ መጋታቱ ካዉተላ ኦይድያን ኡቴዳ ጸሳዉ ጉፋኒደ፤ “አመንእ። ጸሳ ጋላታይ ጋኮ” ያጌደ ሳይኔድኖ።

ደርሳ ቡላቻዉ ጼሰያ ጼሳ

5 ሄዋፕ ጉይያን፤  
 “ጸሳ አይላቱ ኡባይ፤  
 ጸሳዉ ያይያ ጉላይ፤  
 ዳሩ ኡባይ ኑ ጸሳ ጋላትተ”

ያግያ ኮሻይ ካወተላ ኦይድያፕ ከሴዳ።

6 ሄዋፕ ጉይያን፣ ጮራ አሳዳን ኮሹምያ፣ ዋልቃማ ሻፋዳን ጉምያ፣ ዋልቃማ ጉጉንፋዳን ጉጉምያ ኮሻ ታን ሰሳድ። ሄ ኮሻይ፣ “ጸሳ ጋላታይ ጋኩ።

አያዉ ጎፕ፣ ኑ ጎዳይ፣

ኡባፕ ዋልቃማ ጸሳይ ካወቴዳ።

7 ዶርሳ ቡላቻ ጋላሳይ ጋኬዳ ድራዉነ፣

ገለዉናካ ቡላቻዉ ባረና ገግሴዳ ድራዉ፣

ኑን ፓሽኮይተነ ናሽቶይተ፤

ቃይ ዶርሳ ቦንቾይተ።

8 ገለዉንዉ ማያናዉ፣

ሱፍያ ጌተትያ ክርያን ዳደቴዳ፣

ጸልያ ቦላ ማዩ እመቴዳ።

ሱፍያ ጌተትያ ክርያን ዳደቴዳ ማዩ፣

ጌሻቱዋ ጸሎ ኦሱዋ”

ያግያዋ፣ ታን ሰሳድ።

9 ሄዋፕ ጉይያን፣ ኪታንቻይ ታና፣ “ ዶርሳ ቡላቻዉ ጸሰቴዳዋንቱ እንጀቴዳዋንታ ያጋደ ጸፋ” ያጌዳ። ሄ ኪታንቻይ ቃይካ ታና፣ “ሀዌ ጸሳ ቱሙ ቃላ” ያጌዳ።

10 ሄዋፕ ጉዩ ታን አዉ ጎይናናዉ አ ገድያን ኩንዳድ። ሸን እ ታና፣ “ሄዋ አላፓ። ታን ነ ማላነ የሱስ ኡንቱንቶ ቆንጭሴዳ ቱማተላ ኦይቄዳ ነ እሻቱዋ ኡባ ማላ አይልያ። ጸሳዉ ጎይና። አያዉ ጎፕ፣ የሱስ ቆንጭሴዳ ቱማተላይ ትምቢትያ ኦድያዋ ደን፳ያዋ” ያጌዳ።

**ቦላ ፓራ ቶጌዳዋ**

11 ያትና፣ ሳሉ ደየቴዳዋ ታን በኣድ። ሄዋን ቦላ ፓራይ ደኤ፤ ሄ ፓራ ቶጌዳዌ አማነትያዋን ቱማንቻ ጌደ ጸሰቴ። ቶጌዳዌ ጸሎተላን ፕርዴነ ባረ ኦላካ ኦለቴ።

12 አ አይፊ ታማ ላጩዋ ማላቴ፤ ቃይ እ ባረ ሁጲያን ዳር ካላቻ ዋሴዳ። አ ቦላ ጸፈት ኡቴዳ ሱንጎይ ደኤ፤ ሸን ሄ ሱንጎይ አየንቶነ አፕ አትን፣ ኦንነ ኤረና።

13 እ ማዬዳ ማዩ ሱላን ናቂ ከሴዳዋ። አ ሱንጎይካ ጸሳ ቃላ።

---

19:5 ማዘ. 115:13    19:6 ህዘ. 1:24፤ ማዘ. 93:1፤ 97:1፤ 99:1  
19:11 ህዘ. 1:1፤ ማዘ. 96:13፤ ኢሳ. 11:4    19:12 ዲኦላ 10:6

14 ሳሉዋ ዎታዳራቱ ቦላ ጌሻ ሱፍያ ጌተትያ ክርያን ዳደቱዳ ማዩዋ ማዩደ፣ ቦላ ፓራቱዋ ቶጊደ፣ አ ጌዱዋ ካሊኖ።

15 አሳ ዘረላ እ ጳይሰያ ኩሳ ማሻይ አ ደናፕ ከሴ። ብሪታ ጸምኢን አሳ እ ሞዳና። ኡባፕ ዎልቃማ ጸሳይ ባረ ሀንቁዋ ዎይንያ ኤሳይ ጉምኤትያሳን፣ ጉምኢደ በሳና።

16 አ ማዩዋ ቦላን አ ዎድርያ ቦላ፣ “ካታቱዋ ካትያን ጎዳቱዋ ጎዳ” ያግያ ሱንሳይ ጸፈት ኡቴዳ።

17 ሄዋፕ ጉይያን፣ ታን እት ኪታንቻይ አዋን ኤቁዳዋ በአድ። ሄ ኪታንቻይ ሳሉዋን ቶቁደ ፓልያ ካፋዋ ኡባቶ ባረ ኮሻ ቶቁ ኦሐደ፣ “ሃ ዪተ። ጸሳ ካዎ እትሳ ሺቅተ።

18 ዪደ ካታቱዋ አሹዋ፣ ሻላቃቱዋ አሹዋካ ዎታዳራቱዋ አሹዋ ሚተ፤ ፓራቱዋ አሹዋካ ፓራቱዋ ቶጌዳዋንቱ አሹዋካ ሚተ፤ ቃይ አሳ ኡባ አሹዋ አይልያዋን ዎማኑዋ፣ ቶቃዋን ሆካዎ ሚተ” ያጌዳ።

19 ፓራ ቶጌዳዋናን አ ዎታዳራቱዋና አለታናዉ፣ ደአይን ሳአ ካታቱ ቃይ ኡንቱንቱ ዎታዳራቱ እት ሳአ ሺቅ ኡቴዳዋንታ ታን በአድ።

20 ሄ ደአይ አ ሰንላን ማላታ አሌዳ ዎርደ ናብያና እትፕ አይቀቴዳ። ደአ ማላይ ደእያዋንታን ደአ ሞሰለዉ ጎይኔዳዋንታ እ ባለሌዳዌ ሄ አልያ ማላታቱዋና። ደአይን ዎርደዋ ትምቢትያ አድያዌ ላአቱካ ዲንያን ኤጽያ ታማ አባን ፓጸ የገቴድኖ።

21 ኡንቱንቱ ዎታዳራቱ ፓራ ቶጌዳዋ ደናፕ ከሰያ ማሻን ሀይቁድኖ። ካፋቱ ኡባቱ ኡንቱንቱ አሹዋፕ ባረንቶ ዳንዳዬዳዋ ከና ሜድኖ።

# 20

## ሻአ ላይላ ካዉተላ

1 ጨዋ ኦላ ቁልፕያን ዎልቃማ ሳንላላታ ባረ ኩሽያን አይቁዳ እት ኪታንቻይ ሳሉዋፕ ይያዋ ታን በአድ።

2 ኪታንቻይ ዳዊያ፣ ሄ በን ሾሻ፣ ጸላህያ ካፑዋ ዎይ ሴጸና ግያዋ አይቁዳ፤ ያቲደ ሻአ ላይላዉ ቃቼዳ።

3 ኪታንቻይ ጨዋ ኦላን አ የጊደ፣ ሻአ ላይላይ ዉራናዉ፣ አሳ ዘረላ ላኤንሉዋ ባለተና ማላ፣ ሄ ጨዋ ኦላ ቁልፕ ጎርዲደ አታሜዳ። ሄዋፕ ጉይያን፣ ዳዊ አማሬዳ ዎድያ ብለታናዉ በሴ።

19:15 ማዘ. 2:9፤ አሳ. 63:3፤ አዪ. 3:13፤ ሳፃ 14:20 19:17 ሀዘ. 39:17-20 20:2 ደመላ 3:1

4 ሃዋጥ ጉይያን፣ ታን ኦራታቱዋን ኡንቱንቱን ኡቲዳዋንታ በኣድ፤ ኡንቱንቱን ፕርድያ ማታይ እመቲዳ። የሱሰ ቆንጭሴዳ ቱሙዋን ጸሳ ቃላ ኦዋዬዳ ድራወ። ባረንቱ ቆድያ ቃንጸቲዳ ኦሳ ሸምፑዋካ ታን በኣድ። ኡንቱንቱ ዶኦ ወይ ዶኦ ምሰለወ ጎይንበይክኖ። ኡንቱንቱ ዶኦ ማላ ባረንቱ ዳሙዋን ወይ ባረንቱ ኩሸያን ዋላቤይክኖ። ኡንቱንቱ ሀይቁዋጥ ደንዲደ፣ ክርሰቶሳና እትጥ ካተቱዋዳን ሻኦ ላይላወ ሞዴድኖ።

5 ሀይቁዳዋንቱጥ ጮራቱ ሻኦ ላይላይ ወራና ጋካናወ። ሀይቁዋጥ ደንድበይክኖ። ሄዌ ኮይሮ ደንዲዳ።

6 ኮይሮ ደንዲዳዋን ደንዴዳዋንቱ እንጀቲዳዋንታን ጸሳ ኦሳቱዋ። ኡንቱንቱ ቦላ ላኤንሉ ሀይቆ ዋልቃይ ባዋ። ኡንቱንቱ ጸሳወን ክርሰቶሳወ ቄሳቱዋ ግዳና፤ ኡንቱንቱ ኦናና እትጥ ሻኦ ላይላወ ሞዳና።

**ሴጻናይ ጸንቲዳ**

7 ሻኦ ላይላይ ወራዳዋጥ ጉይያን፣ ሴጻናይ ቃሹዋጥ ብለታና።

8 እ ሳኣን ኡባ ሳን ደእያ ኦሳ ዘረላ ባለላናወ ከሳና፤ ሄዌ ጎጋን ማጎጋ ጌተትያዋ። ሴጻናይ ኦባ ሻፍያ ኬና ዘረላ ኦላወ ሺሻና።

9 ሄ ዛራቱ ቢታ ኡባ ማዪደ ጌሻቱዋ ሄራን ጸሳይ ሲቅያ ካታማቶ ዩይ ኦድ ኤቄድኖ። ሸን ታማይ ሳሉዋጥ ዋዲደ፣ ኡንቱንታ ማዳ።

10 ደኦይን ዋርዶ ናቢ የገቲዳ ኤጽያ ዲንያ ታማ ኦባን ጸላህያ ካቱ፣ ኦሳ ዘረላ ባለሌዳዌ፣ የገቲዳ። ኡንቱንቱ ቃማን ጋላሰ መድ መድናወ ፓጸ ካኤታና።

**ወርሰላ ፕርዳ**

11 ሃዋጥ ጉይያን፣ ታን ዋልቃማ ቦላ ኦራታን ሄ ኦራታን ኡቲዳዋ በኣድ። ሳኦይን ሳሉ ኦ ሰንላጥ ባቃቲድኖ፤ ላኤንሉ ቤትበይክኖ።

12 ሀይቁዳዋንቱ፣ ቶቄ ግያዋንቱን ጉላቱ ኦራታ ሰንላን ኤቄዳዋንታ ታን በኣድ። ማጻፋቱ ደየቲድኖ፤ ሀራ ማጻፋይ፣ ደኦዋ ማጻፋይካ ደየቲዳ። ሀይቁዳዋንቱ ባረንቱ ኦሱዋዳን፣ ማጻፋቱዋን ጸፊት ኡቲዳዋዳንካ ፕርደቲድኖ።

13 ኦባይ ባረ ግደን ደእያ ሀይቁዳዋንታ እሜዳ፤ ሀይቁን ሰኦሊ ባረንቱ ግደን ደእያ ሀይቁዳዋንታ እሜድኖ። ኡባይካ ባረንቱ ኦሱዋዳን ፕርደቲድኖ።

---

20:4 ዳኤላ 7:9፣ 22    20:8 ህዝ. 7:2፤ 38:2፣ 9፣ 15    20:11 ዳኤላ 7:9-10



14 ሄዋጥ ጉይያን፣ ሀዩነ ሰኦሊ ታማ አባን የገቴድኖ። ሄ ታማ አባይ ላኤንሶ ሀይቁዋ።

15 ደኡዋ ማጻፋን ባረ ሱንሳይ ጸፈትቤና አሳይ ኦንነ ታማ አባን የገቴድኖ።

# 21

## ኦራላ ሳሉዋነ ኦራላ ሳኣ

1 ሄዋጥ ጉይያን፣ ታን ኦራላ ሳሉዋነ ኦራላ ሳኣ በኣድ። ኮይሮ ሳሉነ ኮይሮ ሳኣይ ጳዩዳ። አባይካ ጳዩዳ።

2 ጌሻ ካታማታ ኦራላ የሩሳላመ፣ ባረ አሰናዉ ማያደ ጊጌዳ ገልያ ዎድሮ ናቲዳን፣ ጊጋ ኡቴዳዉና ሳሉዋጥ ጸሳ ማታጥ ዲገ ዎ።ዉኖ ታን በኣድ።

3 ዎልቃማ ኮሻይ አራታጥ ሀዋዳን ያጊደ፣ ሃሳይሸን፣ ታን ሰሳድ፤ “ጸሳ ጎሊ አሳና ደኤ፤ ጸሳይ አሳና እትጥ ደኣና። ኡንቲንቲ ኦ አሳ ግዳና፤ ጸሳይ ባረ ሁጸዉ ኡንቲንቲና ደኣና። ኦ ኡንቲንቲ ጸሳ ግዳና።

4 ጸሳይ ኡንቲንቲ አይፍያ አፎላ ኡባ ቁጫና። ሀዋጥ ሰንሳናዉ ሀይቁነ ካዩ ዎይ ዋሱነ ሳኩ ባዋ። ኣያዉ ጎጥ፣ ኤጫባይ ጳዩዳ” ያጌዳ።

5 አራታን ኡቴዳዋ፣ “ታን ኡባባ ኦራጽሳይ” ያጌዳ። ቃይካ ጉጂደ ታና፣ “ታን ሃሳይያዌ አማነትያዋነ ቲማ ግድያ ድራዉ ጸፋ” ያጌዳ።

6 ቃይካ ታና ሀዋዳን ያጌዳ፤ “ፖለቲዳ። ታን አልፋነ ኦሜጋ፤ ደመላነ ፖሉዋ። ሳመቲዳ ኦናነ ታን ደኡዋ ሃላ ፑልቲዋጥ ጮ ኡሻና።

7 ጸንያ ኡራይ ኦንነ ሀዋ ኡባ ላታና። ታን አዉ ጸሳ ግዳና፤ እካ ታና ኦ ግዳና።

8 ሸን ያይያዋንቲ፣ አማነናዋንቲ፣ ቲናቲ፣ ሸምጥዎ ዎድያዋንቲ፣ ዎሹምያዋንቲ፣ ብትያዋንቲ፣ ኤቃዉ ሳይንያዋንቲነ ዎርዶትያዋንቲ ኡባይ ደእያ ሳኣይ ታማይነ ኤጽያ ዲኒ ኤጽያ አባ ግዳናዎ። ሄዌ ላኤንሶ ሀይቁዋ” ያጌዳ።

## ኦራላ የሩሳላዋ

21:1 ኢሳ. 65:17፤ 66:22፤ 2 ጳጸ. 3:13    21:2 ኢሳ. 52:1፤ 61:10፤ ሳዖ 3:12    21:3 ሀዘ. 37:27፤ ዎጋ 26:11፤ 12    21:4 ኢሳ. 25:8፤ 35:10፤ 65:19    21:7 2 ሳሜላ 7:14፤ ማዘ. 89:26-27

9 ላፑ ወርሰላ ቦሻቱ ኩሜዳ ላፑ ከረቱዋ ኦይቄዳ ላፑ ኪታንቻቱዋፕ እቱ ታኮ ዪደ ታና፡ “ሃያ። ታን ኔና ገለወኖ ድርሳ ማቻቶ በሳና” ያጌዳ።

10 ኪታንቻይ ታና ዳሮ ቶቃ ደርያ ሁጲያ አያናን ከሲደ ጌሻ ካታማታ፡ የሩሳላማ ሳሉዋፕ ጸሳ ማታፕ ዱገ ዋግወኖ ታና በሴዳ።

11 ሄ ካታማታ ጸሳ ቦንቹዋን ፖኦ። ሄ ካታማት ፖኦ ያሰጲድያ ጌተትያ አልኦ ሹቻ ማላ፤ ብርሊያዳን ጳላ።

12 ሄ ካታማትወ ታማነ ላኡ ፐንገቱነ ሄ ፐንገቱዋን ታማነ ላኡ ኪታንቻቱ ናግያ ዋልቃማ አዱሳ ድርሳይ ደኤ። ፐንገቱዋን ታማነ ላኡ እሰራኤልያ ዛራቱዋ ሱንላይ ጳፈት ኡቱዳ።

13 አዋይ ዶልያ ባጋና ሄዙ ፐንገቱ ደኤኖ። ቃይ ህርክ ባጋና ሄዙ ፐንገቱነ ሁጲሳ ባጋና ሄዙ ፐንገቱ ደኤኖ። አዋይ ወልያ ባጋናካ ሄዙ ፐንገቱ ደኤኖ።

14 ካታማት ድርሳይ ደርሳይ ኪቱዳ ታማነ ላአቱዋ ሱንላይ ጳፈቱዳ ታማነ ላኡ ሹቻቱዋ ቦላ ግምቦቱዳ።

15 ታናና ሃሳዬዳ ኪታንቻወ ካታማቶ፡ እዝ ፐንገቱዋነ እዝ ድርሳ ልክያ ዋርቃ ጋትማይ ደኤ።

16 ካታማትወ ኦይዱ ጋጳይ ደኤ፤ ካታማት ጌሳይነ ጎምፓይ እት ማላ። ኪታንቻይ ካታማቶ ባረ ጋትማን ልኬዳ። ካታማታ ላኡ ሻእነ ላኡ ጳቱ ኪሎ ሚትርያ ግዳዱ፤ ካታማት ጌሳይ፡ ጎምፓይነ ቶቃተላይ እት ማላ።

17 ኪታንቻይ ቃይ ድርሳካ ልኬዳ። አሳ ኩሽያን እት ጳታነ ኦይታማነ ኦይዱ ዋጳ ግዳዳ። ሄዌ ኦንነ ልክያ ኦግያን ኪታንቻይ ልክናዳ።

18 ካታማት ድርሳይ ያሰጲድያ ጌተትያ ሹቻን ድረቱዳ። ካታማታ ብርሊያዳን ጳልያ ጌሻ ዋርቃን መጋታዱ።

19 ካታማት ድርሳወ ሂጳቱዳ ሹቻይ ቦንቹቱዳ ሹቻ ኡባን አሌቀቱዳ፤ ኮይሮ ሂጳቱዳ ሹቻይ ያሰጲድያ፤ ላኤንሉ ሳምፔርያ፤ ሄዘንሉ ከልቀዶንያ፤ ኦይደንሉ ባሉርያ፤

20 እቼሽንሉ ሳርዶንክሳ፤ ኡሱፑንሉ ሳርድዮና፤ ላፑንሉ ክርሰትሎባ፤ ሆሰፑንሉ ብራል፤ ኡዱፑንሉ ቶጳዝዮንያ፤ ታሙንሉ ክርሰጵራሲሳ፤ ታማነ እተንሉ ያክንትያ፤ ታማነ ላኤንሉ አመተሰጵኖሰያ።

21:10 ህዝ. 40:2    21:12 ህዝ. 48:30-35    21:15 ህዝ. 40:3  
21:18 ኢሳ. 54:11-12

21 ታማነ ላኡ ጥንገቱ ታማነ ላኡ እንቁዋ ጌተትያ አልኦ ሹቻ፤ እት እት ጥንገ እት እንቁዋን ኦሰቴዳ። ካታማት ኦጊ ብርልያ ማላ ጌሻ ዋርቃ።

22 ጎዳይ፣ ኡባጥ ዋልቃማ ጸሳይነ ዶርሳይ ካታማት ጌሻ ጎልያ ግድያ ድራው፣ ታን ሄ ካታማትን ጌሻ ጎልያ በእበይከ።

23 ካታማትዉ ፖእያ አዋይ ዋይ አገናይ ኮሸና። እያዉ ጎጥ፣ ጸሳ ቦንቹ ሄ ካታማትን ፖኤ፤ ዶርሳይካ ሄ ካታማትዉ ጸምጥያ።

24 አሳ ዘረላይ ካታማት ፖኡዋን ሀመታና። ሳኣ ካታቱካ ባረንቱ ቦንቹዋ ሄ ካታማትኮ አሀና።

25 ካታማት ጥንገቱ ኡባ ጋላሰካ ዶያ ደአና፤ ኡባካ ጎርደትክና። እያዉ ጎጥ፣ ሄዋን ቃማይ ባዋ።

26 አሳ ዘረላ ግታተላይነ ቦንቹ ሄ ካታማትኮ ሺቃና።

27 ሸን ቱናባይ ዋይ ካዉሻባ አላያዌ፣ ዋይ ዋርዶትያዌ ኦንነ ሄ ካታማቶ ገለና። ቃይ ዶርሳ ደኡዋ ማጻፋን ሱንላይ ጸፈቴዳዋንቱ ጸላላይ ሄ ካታማቶ ገለና።

## 22

1 ሄዋጥ ጉይያን፣ ኪታንቻይ ታና ጸሳ ካዉተላ ኦይድያጥነ ዶርሳ ካዉተላ ኦይድያጥ ጎግያ ብርሊያዳን ጸልያ ደኡዋ ሃላ ሻፋ በሴዳ።

2 ሄ ሻፋይ ካታማ ኦግያ ግዲዋና ዲገ ጎጌ። ሻፋጥ ሄፍንላ ባጋናነ ሀፍንላ ባጋና አገናን እት ገደነ ላይላን ታማነ ላኡ ገደ አይፍያ ደኡዋ ሞላይ ደኤ። ሄ ሞላ ቦንቹ ደእያዌ፣ ዛርያ ኡባ ሀርግያጥ ፓላናሳ።

3 ሄ ካታማን ጸሳ ሸቃይ አይነ ባዋ። ጸሳ ካዉተላ ኦይዲነ ዶርሳ ካዉተላ ኦይዲ ሄ ካታማን ደአና። ጸሳ ኦሳንቻቱ ጸሳዉ ጎይናና።

4 ኡንቱንቱ አ ዴሙዋ በአና፤ አ ሱንላይ ኡንቱንቱ ዴሙዋን ጸፈታና።

5 ሄዋጥ ሰንላዉ ሀራ ቃማይ ባዋ። ኡንቱንቶ ጸምጥያ ዋይ አዋ ፖኡዋ ኮሸና፤ እያዉ ጎጥ፣ ጎዳይ ጸሳይ ኡንቱንቶ ጸምጥያ ግዳናዋ። ኡንቱንቱ መድ መድናዉ ካተታና።

---

21:23 አሳ. 60:19-20    21:24 አሳ. 60:3    21:27 አሳ. 52:1፤ ህዝ. 44:9    22:1 ህዝ. 47:1፤ ዛካ. 14:8    22:2 ዶመላ 2:9፤ ህዝ. 47:12  
22:3 ዛካ. 14:11    22:5 አሳ. 60:19፤ ዳኤላ 7:18

የሱሳ ዩሳ

6 ሄዋጥ ጉይያን፣ ኪታንቻይ ታና ሀዋዳን ያጌዳ፤ “ሀ ታን ሃሳይያዌ ቱሙዋነ አማነትያዋ። ናባቶ ባረ ጌሻ እያና እምያ ጎዳይ ጸሳይ፣ ማታን ሀናናዉ በሰያዋ ባረ ኦሳንቻቱዋ በሳናዉ ባረ ኪታንቻ ኪቴዳ” ያጌዳ።

7 የሱሰ፣ “በእ! ታን ኤለካ ያና። ሀ ማጻፋን ደእያ ትምቢትያ ናግያዋንቱ አንጀቴዳዋንታ” ያጌዳ።

8 ታን ዮሃንሰ፣ ሀ ኡባባ ሰሳድነ በእድ። ታን ሀዋ ሰሴዳ ዋደነ በኤዳ ዋደ፣ ሄዋ ታና በሴዳ ኪታንቻዉ ጎይናናዉ፣ አ ገድያን ኩንዲድ።

9 ሸን ኪታንቻይ ታና፣ “ሄዋ አላገ። ታን ኔናዳንነ ናበ ግዴዳ ነ እሻቱዋዳን፣ ቃይ ማጻፋን ደእያባዉ አዛዘትያ ኡባቱዋዳን አይልያ። ጸሳዉ ጎይና” ያጌዳ።

10 ሄዋጥ ጉይያን፣ ኪታንቻይ ታና፣ “ሀናና ጌዳ ሀ ማጻፋ ቃለ ማታፋን ጎርዶገ። አያዉ ጎጥ፣ ሀ ኡባባይ ፖለትያ ዋዲ ማታቴዳ።

11 ኢታባ አሳያዌ ጉጂደካ ኢታባ አሳ፣ ቱናይ ጉጂደካ ቱኖ። ሎኦባ አሳያዌ ጉጂደካ ሎኦባ አሳ፣ ጌሻይነ ጉጂደካ ጌሻ ግዶ” ያጌዳ።

12 የሱሰ፣ “በእ! ታን ኤለካ ያና። አሳ ኡባዉ አ ኦሱዋዳን አማናዉ፣ ታ ዋይታ አካ ያና።

13 ታን አልፋነ ኦሜጋ፤ ኮይሩዋነ ዉርሰላ፤ ዶመላነ ፖሉዋ” ያጌዳ።

14 ባረንቱ ማዩዋ ጌሽ ሜጭያዋንቱ አንጀቴዳዋንታ። ደኡዋ ሞላ አይፍያ ማናዉነ ካታማ ፐንግያና ገላናዉ ኡንቱንቶ ማታይ አመቱዳ።

15 ሸን ካናቱ፣ ብትያዋንቱ፣ ዋሹምያዋንቱ፣ ሸምፑዋ ዋድያዋንቱ፣ ኤቃዉ ጎይንያዋንቱ፣ ባረንቱ ሃሳያንነ ባረንቱ ኪታን ዋርዶትያዋንቱ ካረና ደኢኖ።

16 “ታን የሱሰ፣ ሀ የዉዋ ሀንተንቶ ዋሳ ጎለቱዋን ማርካታና ማላ፣ ታ ኪታንቻ ኪታድ። ታን ዳዊታ ጎልያ የለታ። ታን ፖእሰያ ዋንታ ባካልያ” ያጌዳ።

---

22:11 ዳኔላ 12:10    22:12 ኢሳ. 40:10፤ 62:11፤ ማዘ. 28:4፤ ኤር. 17:10    22:13 ሳ፻ 1:8፣ 17፤ 2:8፤ ኢሳ. 44:6፤ 48:12    22:14 ዶመላ 2:9፤ 3:22    22:16 ኢሳ. 11:1፣ 10

17 ጌሻ አያናይነ ገለጧና፡ “ሃያ” ያገና። ቃይ ሀዋ ሰሰያዌ ኦንነ፡ “ሃያ” ያገ። ሳመቴዳ አሳይ ኦንነ ሃ ዮ። ደኡዋ ሃላ ኮይያ አሳይ ኦንነ ጮ አኮ።

18 ታን ሀ ማጻፋን ጸፈቴዳ ሀናና ጌዳ ቃላ ሰሰያ ኦናነ ዞራይ። ኦንነ ሀ ቃላ ቦላ እትባ ጉጀፕ፡ ጸሳይ ሀ ማጻፋን ጸፈቴዳ ቦሻ ኦ ቦላ ጉጀና።

19 ኦንነ ማጻፋን ደእያ ትምቢትያ ቃላፕ አያነ ፓጭሶፕ፡ ሀ ማጻፋ ግዶን ቆንጭሴዳ ደኡዋ ሞላ አይፍያፕነ ጌሻ ካታማፕ ኦ ፓክያ ግሹዋ ጸሳይ ፓጭሳና።

20 ሀ ኡባባጧ ማርካትያዌ፡ “ቴማ! ታን ኤለካ ያና” ያጌ። አመንአ። ጎዳ የሱሳ፡ ኔን ሃያ።

21 ጎዳ የሱሰ ክርሰቶሳ አጼ ኬካተሳይ ህንተናና \* ኡባና ግዶ። አመንአ።

---

22:17 ኢሳ. 55:1    22:19 ዛረ. 4:2፤ 12:32    \* 22:21 ህንተናና- ጮራ ሀራ ብለላቱዋን፣ ጸሳ አሳ ኡባና ያጌ።

## ጌሻ ማጻፋ

### **The Holy Bible in the Dawro language of Ethiopia**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Dawro

### **© 2011-2024, Wycliffe Bible Translators, Inc. and The Word for the World International**

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

---

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c